

JONE

Jone baame banya waili pii keyange dokona Yesu baa Anatunya Pii lete karengere dokome namwa isa wambunya yongo nyuo epapala namwa pipya role pyao kareya, leyapya. Wambu buku dake yaka laraminyi dupwame Anatunya Ikinyingi Pyuo Nyingi Akali epara lao, Anatumi lalu lao leyamo doko Yesu soo nyuo baa kapa ingingi lao suu pyapala kyakana renger nyerami lao Joneme pepa dake pyao reteyapya (20:31).

Pyao kanda soo dokopa Yesu baa Anatunya Pii lete karengere doko Joneme pyao reteya. Pyao retapala baame Yesumi mirakele yulu wakale wakale piyamo dupwana lao pyao reteya. Dopa lao baame Yesu Anatunya Ikinyingi dee Pyuo Nyingi Akali epara lao lalu lao leyamo dokojo lao lasaka piya. Lasaka pipala baame mirakele yulu Yesumi piyamo dupwana renger angi polo leya. Wambu lapome Yesu kapa ingingi lao suu pyapala baa kimbu moko minyuo peyami. Dopa piyaminyipape wambu wakale lapome Yesu mata maiyuo daa lao kapa ingingi lao suu pyaa nayami. Rombo 13–17 kukwa dokopa akali dupwame oo repeta Yesu puu maiyuo nyela epeyaminyipa Yesu banya disaepole dupwa pipya yalya kando peteyaminyi pii doko pyasi palamo. Kukwa dokopa Yesu baame banya disaepole dupwa porainyi pyambu mona minyarambu pii lamaiyuo kareya dokona pyasi palamo. Rombo 18–21 dupwana akali dupwame Yesu puu maiyuo nyela epeyaminyi dokonape kote lao randa maiyaminyi dokonape dee Yesu isa mamando dokona kumuo palipala lopo epapala banya disaepole dupwa keta paneyamo dokonape lao pyasi palamo.

Enda kepo pyuo kareyamo dokona pii (8:1-11) Baepole lapona make dopale [] kame pipala kanya dokona pyasi palamo. Akipamo rombo pyao kame piru karape? Renger doko Joneme wambo piyamo dokona pii paleyamo dokona lapo enakana pyao nyiyaminyi dupwame lapo yaki nyiyamipyaa. Dee lapome peparaee pyao nyiyaminyipape panda serali lapona reta napala mendasa pao retapa piyamipyaa.

Joneme pii angingyuwale laokonda piya doko Koraisa baame lete renger maingi. Mendeme baa kata kinyinya renger letena renger lao suu pyaraminyi dupwa lete renger doko nyerami ingilyamo lao piyapya. Jone baame mee isa bange lapo ipwape boretepe yanga paupau lengepe mena sipisipi isingipi dee banya sipisipi dupwape isa girapope dee dokona jingipi dupwana alya minyuo kongwalunya palyapala Anatunya renger angi doko polo lamaiya.

Jonena pii doko Yesu baa Anatuko doko dee akali opetaeko ingyuo karamo, leya.

Buku Dakena Pii Palamo Dasipa

1. Pii kanda siya doko *1:1-18*
 2. Jone Bapitismopa Yesumi banya disaepole wambo kanda soo kee leyamo dupwape *1:19-51*
 3. Yesumi panembena wambu dupwa pii polo lamaiya *2:1-12:50*
 4. Yesu oo repeta kumara ingiyamo dokopa baa yuu Jerusaleme dokona kareya *13:1-19:42*
 5. Yesu baa kumapala lopo epapala banya disaepole dupwa keta paneya *20:1-31*
 6. Yuu Galili dokona Yesu baa dee paneya pii dokome lao lumwa piya *21:1-25*
-

Anatunya Pii Doko Wambu Yongo Nyiwa

1 ¹Ene busapa nayamopa Pii doko kareya. Pii doko Anatupa kareyambi. Pii doko Anatu dokonako angingyuo kareya. ²Ene busapa nayamopa baa Anatupa kareyambi. ³Anatumi keta bange peparae wasiya. Bange mendepe baa keta wasa nayamopa puliyande daa. ⁴Baa letena renge doko renge kuiyuo kareya. Letena renge doko isa wambu keta yanga paupau lanyi peeyakamiya. ⁵Iminjingi panda dokona yanga paupau lakamilyamopa iminjingi doko yanga paupau lenge doko kapa kunja nange.

⁶Anatumi akali mende kingi Jone lenge doko pena leyamopa epeya. ⁷Baa yanga paupau lenge dokona waili pii lao akali peparaeme pii doko kinyilyamo lao suu pyapala mona mainyale lao karala epeya. ⁸Baa range yanga paupau lenge doko angingyuo kareyande daa. Baa yanga paupau lenge dokona lao waili pii minyuo epeyasa piya. ⁹Yanga paupau lenge angi wambu peparaena suu pingi dokona yanga paupau lanyi peenge doko isa yuu dakena epo kareya.

¹⁰Baame isa yuu dake wamba wasiyamo dokona epo kareyamopape isa wambu dupwame baalamo lao kando soo nyii nayami. ¹¹Banya yuu range dokona epeyamopape banya wambu dupwame baa yako lao nyii nayami. ¹²Yako lao nyii nayaminyipape wambu baa yako lao nyepala banya kingi doko kapa ingingi lao suu pyapala mona maipa piyami dupwa Anatunya wane wanake ingyuo karena lapa piya. ¹³Isa akalimi ranjama rongo pilyamo yanengena yulu palyuo manjo nyero lao suu pyapala manjo nyingi dopa pyuo manjo nyiyaminde daa. Anatumi nakama manjo nyiwa.

¹⁴Pii doko baa isa wambunya yongo nyepala namwa pipya role pyao kareya. Kinyinya rengepe mona keyange palyuo ipingi rengepe baa keta palyuo simbuyamopa ama yanga paupau lao kareyamo kandeyama. Baa Ikinyingi mendaki dokona Rakangeme yanga paupau lao karenge renge doko baa keta pyamalyiyamo kareya.

¹⁵ Joneme baasa kando dopa lao pii ketae palyuo leya. Mendende enakana eparamo doko baa wambowana karengé dokona namba baapa manda manjo kapa kara nalyo leyo kande doko akali dakerje leya.

¹⁶ Mona keyange palyuo ipingi renge baa keta palyuo simbulyamopa imambunya renge keyange dupwa namwa peparae konda pyuole jepa pingi. ¹⁷ Mawa Pii doko Mosese keta jiya. Enakana dokopa mona keyange palyuo ipingi rengepe pii angi kinyinya renge dokope Yesu Koraisa baa keta paleyamopa epeya. ¹⁸ Mendeme Anatu kanda nange. Ikinyingi mendaki iki doko Rakangena mona enge dokona karengé dokome baa apiyakalende lao rolo leya.

Jone Bapitisimo Nyakamaingi Baame Waili Pii Lao Kareyamo Doko
(*Mat 3:1-12; Mak 1:1-8; Lu 3:1-18*)

¹⁹ Juu wambumi purisi lapope Lipae rara dokona lapope Jerusaleme karo Jone baa apa pyuondepe lao piso sela pena leyami. ²⁰ Dokopa Joneme kalyama napala dopa lao polo leya. Namba Koraisa daa, leya. ²¹ Dokopa nakamame piso soo, Dokonako suu pyao emba Ilainjape? leyami. Baame, Namba daa lyakande, leya. Anatumya pii nolako lao epara leyami emba akali dokope? leyami. Baa isingi lao, Daa leya. ²² Dokopa emba apipi lao rolo langipi. Piso sela pupwape lami dapwa nakama pii mende isingi lamairama ingilyamo. Emba rangesa suu pyao apiyakalende karene lao rolo langipi leyami. ²³ Dokopa baa dopa leya. Anatumya poropeta akali Aisayame.

Yuu muiyane dokona pii mende, Kamongona kata doko rolo pipwape,
Lao karara leyamo doko namba,
leya.

²⁴⁻²⁵ Dokopa Parisi akali dupwame pena leyamisa epo kareyami akali dupwa dee kamba piso siyami. Emba Koraisa ingya naope Ilainja ingya naope Anatumya poropeta akali pii nolako lao karara leyami doko ingya naope pyuo karare ramo doko akipamo embame bapitisimo nyakamyuo karene? leyami. ²⁶ Joneme nakama isingi dopa lamaiya. Namba ipwana bapitisimo nyakamyuo karo. Nyakamyuo karapunupape nakama karaminyi raka dokona mendali karamo doko nakama kando see nalyaminyi. ²⁷ Namba wambole ipunupa enakana eplyamo dokosa leto. Banya kimbu suu lyolo doko namba kwaenge dokome kapa polaro ingya nalyamo leya.

²⁸ Yuu Betani ipwa Jotane dumarena singi Jone bapitisimo nyakamyuo kareya yuu dokona dopa lao kareyami.

Anatumya Sipisipi Ikyane

²⁹ Dokopa yangama dokopa baa kareyamo dokona Yesu epeyamo kandeya. Kandapala, Anatumya Sipisipi Ikyane isa wambu dupwana

koo dupwa nyuo lanyakao para doko kandalapa. ³⁰Akalinde enakana eparamopa baa wambowana karengé dokona namba baapa manda manjo kara nalyo leyo kande doko lyakande. ³¹Baa apisi lao soo gisa nayonopape Isaraele wambu baa soo nyinyale lao ipwa dokome bapitisimo nyakamyuo epeyo leya.

³²Lapala Jone dopa lao lao roleya. Imambu doko yaka wayamu dopale ingyuo yake panda piso lupyuo epo baa keta kareyamo kandeyo. ³³Nambame baa apa pyuonde lao soo gisa nayo. Soo gisa nayonopape namba ipwa dokona bapitisimo nyakamila puu leya dokome namba dopa langiya. Imambu doko lupyuo epo akali mende keta kareya kande dokomeko wambu dupwa Imambu Poo Pyasi dokome bapitisimo nyakamyuo karara langiya. ³⁴Dokonako ingyuo baa Anatunya Ikinyingi doko kandapala rolo leto, leya Joneme.

Yesumi Disaepole Lapo Kanda Soo Rombo Palyiya

³⁵Dokona yangama dokopa Jonemoo banya disaepole lamape role pyao kareyami. ³⁶Dokopa Yesu kata epo peyamo kandapala, Anatunya Sipisipi Yakane doko karamo kandalapa leya. ³⁷Leyamopa disaepole akali dolapo pii doko sepala Yesu peyamo dokona enakana peyambi. ³⁸Yesu kapu kyuonakamba enakana epeyambi doko kandapala nakamba lamaiyuo, Aki kotala epelyambinyi? leya. Dokopa nakambame baa lamaiyuo, Rapae (pii doko Mana Lenge dopakale), emba anja palenge? leyambi. ³⁹Baame nakamba lamaiyuo, Kandala mwua leya. Baa Paleya doko kandala papala poo keloke yuu kwuayamo dokopa baamoo role pyao peteyami.

⁴⁰Akali lama Jonena pii sepala Yesu peyamuli pyuo peyambi dokona mende Enduru lenge Saimone Pitana yangonge doko. ⁴¹Baa aopa yangonge Saimone koto kando nyepala dopa lamaiya. Nambwa Mesaya doko kando nyelambano, leya. (Mesaya doko Koraisa dopale.) ⁴²Baame Yesu kareyamo dokona Pita lanyuo peya. Yesumi baa kandapala dopa leya. Emba Saimone Jonena ikinyingi lyasili. Emba kingi Sipasa larama leya. (Kingi Sipasa doko wambu kingi kana dopale.)

Yesu Baame Pilipapa Natanielepa Rombo Palyiya

⁴³Dokona yangama dokopa Yesu Galili dokona paro lao suu pyapala Pilipa koto kando nyepala namba paronuli pyuo ipupi, lamaiya. ⁴⁴Pilipa baa yuu Betesaita range Enduru Pitapana yuu anda repe repe pyuo karengé dokonako palenge. ⁴⁵Pilipame Nataniele koto kando nyepala baa dopa lamaiya. Moseseme Lowa buku dokonape dee Anatunya poropeta akali dupwapeme pepa pyao akali mende epara leyami kande doko Yesu Nasarete range Josepena ikinyingi doko kando nyelamano leya. ⁴⁶Natanieleme baa lamaiyuo, Yuu Nasarete dokona aki renge keyange mende pulyingisi? leya. Pilipa baa lamaiyuo, Kandambana bwua leya.

⁴⁷Yesumi Nataniele epeyamo kandapala baasa kando lao, Doko Isaraele akali anginji panga see nange lyakande leya. ⁴⁸Natanieleme baa lamaiyuo, Apa pipyasa embame namba letepe? leya. Yesumi isingi lamaiyuo, Pilipame emba ene kee lapa napyamopa isa piki rengesa isarena pisipinyi dokona emba kandapu leya. ⁴⁹Natanieleme baa lamaiyuo, Rapu Pingi emba Anatanuya Ikinyingilyamo emba Isaraele wambu dupwana Kinjilyamo leya. ⁵⁰Yesumi baa dopa lamaiyuo, Namba emba isa piki lungwalungwa pisipinyi kandapu, lapunu pii dokona dopa lao suu pilipi? Dake kandapala letenyakao dojo rengya yulu wakasa lapo kando sere leya. ⁵¹Lapala baame dopa lamaiya. Kinyi kinyi langilyu, yake kata lumbwaramopa Ikinyingi Akali kararamo mare dokona Anatanuya aḡala dupwa lupyuo epo pulyuo pao pyuo kararami kandare leya.

Enda Yapo Nyiyami Dokona Yesumi Andake Piya

2 ¹Yuu lama epo papeyamopa yuu Kena yuu Galili dokona singi dokona enda mende yapo nyiyami. Dokopa Yesunya endangi dokona role pyao peteya. ²Dokopa Yesumoo banya disaepole pipya enda akalipa nyilyambinyi dokona kandala epena leyami. ³Dopa piyambinyipa waene ipwange nao oteyamisa Yesunya endangi dokome baa lamaiyuo, Nakamana waene ipwange daalyamo leya. ⁴Dokopa Yesumi baa dopa lamaiyuo, Embame namba aki mende pinya lao suu pilisi? Nambana yuu gii ene pyaka sepa nalyamo leya. ⁵Leyamopape banya endangi dokome yulu pingi wambu dupwa dopa lamaiya. Baame nakama mende pipwa leya kande dokona palyuo pipwape leya. ⁶Juu wambu dupwa nakamana yulu palengenyili pyuo yanenge wate pingi dokona lao kipwa pee kameya pakinyamange pyakambwaro kaname wasisi dusipa reteyaminyi siya. ⁷Doko kandapala Yesumi lao, Pee dusipa ipwa kyano pyuo simbwalapape leya. Leyamo dokopa pee kambu dokona kyano pyuo simbuyami. ⁸Dokopa, Epapu lama kamuo nyepala nenge nao petaminyi akali rapu pyuo petamo dokona minyuo pupwa leya. Dokopa minyuo peyami. ⁹Dokopa nenge nao peteyami akali rapu pyuo peteyamo doko mee ipwa doko pao waene ipwange ingiyamo doko nakanju siya. Baa anjarae sipyamo nyimi lao soo gisa naya. (Soo gisa nayamopape yulu pingi wambu kamuyami dusipame soo gisiyami.) Baame soo gisa nayamo dokome enda yapo nyiyamo akali doko epena lapala ¹⁰dopa lamaiya. Wambu peparaeme nakamana waene ipwange keyange doko wambo mokwa soo maingi. Mailyaminyipa wambu dupwame malu napelyaminyi dokopa enakana waene ipwange aeyange dupwa mokwa soo maingi kandale. Dopa pilyaminyipape embame dakepale waene keyange doko wambo mokwa soo mai napala ene dakepa mailinyi leya.^a

^a 2:10 Pee dusipa ipwa kyano pyuo simbwalapape. (2:7)

¹¹Yuu Kena yuu Galili siyamo dokona Yesumi yulu andake doko kanda soo lasaka piya. Dokome banya yanga paupau lenge yulu doko nolakaya. Dokopa banya disaepole dupwame baa kapa ingingilyamo lao suu pyapala mona maiyami.

¹²Enakana baamoo endangimoo banya yangonge dupwape disaepole dupwa pipya yuu Kapaneame dokona lano peyami. Papala yuu dokona yuu lapo kareyami.

Yesumi Tembole Anda Dokona Bisinase Akali Dupwa Pyao Raliya
(*Mat 21:12-13; Mak 11:15-17; Lu 19:45-46*)

¹³Dokopa Juu wambunya Pasopa nenge nenge gii doko pyaka siyamopa Yesu Jerusaleme dokona lalyuo peya. ¹⁴Papala tembole anda dokona bulamakaope sipisipipi, yaka wayamupi ropo pingi akali dupwa dee kana yango alowa pingi akali dupwape pyuo peteyaminyipa kando nyiya. ¹⁵Kando nyepala puu walenge lapo minyuo kambwa pyapala dupwa peparae sipisipipi bulamakaope tembole anda dokona kara nana lao pyaroko pyao ralinyi nembeya. Nembapala kana alowa pingi akali dupwana kana kulimbwanyi nembapala rate dupwa minyalyapala pyale lapa piya. ¹⁶Pyale lapala yaka wayamu ropo pyao maingi akali dupwa kando dopa lamaiya. Bange dapwa minyuo pupwa. Nambana Rakanena anda dake bisinase anda ingyuo karaka nana leya. ¹⁷Dokopa banya disaepole dupwame pii pyasi palenge dokona, Embena anda suu pyao yulu andake isare rao pyuo kararo, pii pyasi palenge doko suu piyami.^b

¹⁸Baa dopa piyamo dokopa Juu wambu dupwame baa lamaiyuo, Renge andakende emba keta palipyamo pilyuŋu lao yulu andake mende pyuo lasaka pyaale leyami. ¹⁹Yesumi isingi dopa lamaiya. Tembole anda dake pyao lalinyi nembarami ramo dokopa namba yuu remasa dee piru. ²⁰Dokopa Juu wambu dupwame dopa leyami. Tembole anda dake ee kana akalisa pao kisima ipisu pakinyamange pyakambwaro piyami kande doko kaepala embame yuu rema piru letepe? leyami.

²¹Dopa leyaminyipape Yesumi banya yanenge doko suu pyao tembole anda doko makande minyuo leyasa piya. ²²Dokona suu pyao baa enakana kumuo paleyamopa minyalyuo nyepeyamo dokopa banya disaepole dupwame dopa leya kande lao suu piyami. Lao suu pyapala pii pyasi palenge dokope Yesu leyamo pii dokope pii kinyilyamo lao suu piyami.

Yesu Baame Wambu Pepararena Mona Anda Kandenge

²³Pasopa nenge nenge gii dokopa Jerusaleme karo yulu andake pipa pyuo kareyamo dupwa kandapala wambu malu dupwame banya kingi dokona kapa ingingi lao suu piyami. ²⁴Lao suu piyaminyipape

^b 2:17 Nambana Rakena anda dake bisinase anda ingyuo karaka nana leya. (2:16)

Yesu nakamana mona anda kandenge dokome baa nakama pipa mona mendakinya palyapa nao kareya. ²⁵Baame isa wambunya monarena soo gisingi dokome mendeme isa akali dopa pyuo pinginji lao baa lamairami ingya naya.

Akali Nikotimasa Baame Yesu Kandala Peya

3 ¹Parisi akali mende Nikotimasa lengende kareya. Baa Juu wambunya akali mupwa ingyuo kareya. ²Kukwa mendepa akali doko Yesu kareyamo dokona epapala dopa lamaiya. Rapu Pingi Anatumi emba puu leyasa mana lao epee doko namwa silyamano. Dokona lao embame yulu andake lasaka pyuo karene dupwa akali mendeme pyuo kararo laramopa Anatumi nyiso kara nara ramo baa pinya saka nara ingilyamo leya. ³Yesumi baa lamaiyuo, Kinyi kinyi langilyu, mendalipi kyaka ingyuo manjo nyii nara ramo dokome Anatunya isingi yulu doko kando nyii nara leya. ⁴Nikotimasame baa dopa lamaiya. Apa pyuo andapae doko dee manjo nyingi? Endanginya ingi anda dokona kamba pao paliramo kapa manjo nyingisi? leya. ⁵Yesumi dopa lao isingi lamaiya. Kinyi kinyi langilyu, mendali ipwana palyuo nyuope Imambu dokomepe manjo nyii nara ramo dokome baa Anatunya isingi yulu dokona sukusa parande daa. ⁶Yanenge karengendeme mandenge dokona yanengeko pyaka lyingi. Imambu dokome manjo nyingi dokopa imambu ingingi. ⁷Emba kyaka ingyuo manjapenge ingilyamo lao karo dokona mona namba napipi. ⁸Porambaiye doko mee maso epenge. Emba poo lao epeyamo mee singi. Doko anja piso epapala lao anjarena pelyamo lao see nange. Doko suu pyao Imambumi manjo nyingi wambu dupwa peparae kata mendaki dokonako ingyuo penge leya. ⁹Nikotimasame lao, Doko apa pyuo pingi? leya. ¹⁰Yesumi dopa lao isingi lamaiya. Emba Isaraele wambunya mana lenge ingyuo karene kande dokome pii doko soo nyii nalepe? ¹¹Kinyi kinyi langilyu, namwa soo gisilyamano dokona polo laope, angi kandenge doko rolo laoko pyuo karelyamanopape nakamame namwana pii doko soo nyepa nange. ¹²Nambame isa yuunya yulu palengenyili pyuo langyalono dokopa pii doko kinyilyamo lao suu pyaa nalene dokona yake pandana yulu palenge dokona langirunu dokopa apa pyuo kinyilyamo lao suu pyarese? ¹³Akali mende yake panda sukusa dokona pulyuo paa nange. Ikinyingi Akali yake panda dokona karo lupyuo epeya dokoko iki penge.

¹⁴Dee, Moseseme yuu muiyane dokona kau doko ketae minyalyiya doko suu pyao Ikinyingi Akali ketae minyalyarami ingilyamo. ¹⁵Dokome wambu baa kapa ingingi lao suu pyapala mona mairami dupwa kyaka palenge renge kulisa doko kapa nyerami ingilyamo leya. ¹⁶Anatumi isa wambu dupwa ama mona retapala banya Ikinyingi mendaki dokoko jiya. Dokona baa kapa ingingi lao suu pyarami dupwa kwalu kwao kwaa napala kyakana renge palu palenge

doko nyerami. ¹⁷Dokonako ingyuo Anatumi Ikinyingi dokome isa wambu dupwa yapalya yapana pyuo lao koo keta palyala pena leyande daa. Baame isa wambu dupwa lete wai pyao nyera lao pena leya. ¹⁸Baa kapa ingingi lao suu pyapala mona mairami dupwa kambuyanda pyuo lao koo keta palyaramo kara narami. Mendeme baa kapa ingya nange lao suu pyapala mona mai nalyaminyi dupwa epapu kambuyanda pyuo koo keta palyapyamo karaminyi. Anatumya Ikinyingi mendaki dokona kingi doko kapa ingya nange lao suu pyapala karaminyi dokona kote pii palamo. ¹⁹Yanga paupau lenge doko isa panda epeyamopape isa wambu dupwame baa mona mai napala yulu koo pingi dokome iminjingi yulu dupwa mona mailyaminyi renge dokona kote pii palamo. ²⁰Wambu yulu koo pingi dupwa peparaeme yanga paupau lenge doko awa napala nakamana yulu koo dupwa nolako see nana lao yanga paupau lenge dokona epa nange. ²¹Dopa pilyaminyipape yulu angi rolae pyuo karengi dupwame yanga paupau lenge panda dokona pyuo karengi dokome wambu peparae nakama Anatumya yulu rolae pyuo karaminyi doko kandarami.

Jone Baame Yesu Ketae Nembo Leya

²²Enakana Yesumoo disaepole dupwa pipya yuu Jutia dokona peyami. Dokona baa nakama role pyao karo bapitismo nyakamyuo kareyami. ²³Jone baame opetae bapitismo nyakamyuo kareya. Doko yuu Ainone yuu Selima repeta ipwa malu siyamosa dokome yuu dokona bapitismo nyakamyuo kareya. Dokopa wambu dupwa epo bapitismo nyiyami. ²⁴(Jone karapusi anda dokona ene palipa nayamopa piya.)

Juu Wambumi Misi Yulunya Yanenge Wate Pingi

²⁵Dokopa Jonena disaepole dupwape Juu akali mendemoo Juu wambumi misi yulunya yanenge wate pingi dokona lao apiyanda piyami. ²⁶Dokona lao Jone kareyamo dokona epapala baa dopa lamaiyami. Rapu Pingi, emba akali ipwa Jotane dumurena kareyambi dokosa kando lao rolee kande dokome dae karo bapitismo nyakamyuo karapyamopa wambu peparae baa karapyamo dokona papa pyuo karaminyi kande, leyami. ²⁷Joneme isingi lao dopa leya. Yake panda rae dokome mende mai nara ramo doko wambu mendeme kapa nyera ingya nara. ²⁸Namba Koraisa daa. Banya lenge kambu dokona puu lapyasa epelyo leyo kande dokona lao nakama rangeme soo lalaminyi kandapi. ²⁹Akali enda nyera ingilyamo doko nyera. Dokopa banya andare dokome banya pii soo raerae minyuo karengi doko suu pyao namba epapu raeme kumuo karo. ³⁰Banya yulu doko ando nyimbu paramopa nambana yulu doko kukyu para ingilyamo leya.

Yake Panda Rae Epeyamo Dokona Pii Lapo

³¹Yake panda rae epelyamo doko peparaena ketae ingyuo karamo. Mee isa akali dupwa isa wambumi manjo nyisinde karengi dokome banya pii

doko isa yuunya pii lao kareng. Yake panda rae epeya doko peparaena ketae ingyuo karamo. ³²Baa kandeyamo dupwa lao rolo karapyamopape mendeme banya pii doko yako lao sepa nalyaminyi. ³³Mendeme banya pii doko yako lao separa ramo dokome baa Anatu kinyi angilyamo lao soo giso parasa pira. ³⁴Dokona lao Anatumi mapanyi peeyamo epeyamo dokome Anatunyako pii lao karamo. Anatumi Imambu doko pingyapala mainginde daa. ³⁵Rakange dokome Ikinyingi doko mona retenge, dee, baame bange yulupi peparae banya kingi kape dokona reteya. ³⁶Ikinyingi baa kapa ingingi lao suu pyapala mona maiyuo karaminyi dupwa kyakana renge kulisa palu palenge doko nyerami. Mendeme Ikinyingi doko laramuli pyuo pyuo kara naramo doko kyakana palenge renge doko kando nyii nara ingyaramopa Anatunya imbu singi doko baa keta palira.

Yesumi Samaria Enda Mana Lamaiya

4 ¹Parisi dupwame Joneme wambu mendasipa iki bapitisimo nyakamipyamopa Yesu baame andare nyakamilyamo lao soo manjo nyiyami. ²(Yesu baa rangeme bapitisimo nyakamyuo kara naya. Banya disaepole dupwame nyakamiyami.) ³Parisi dupwa soo karaminyi lao soo gisapala Kamongo dokome yuu Jutia yaki nyepala yuu Galili dokona peya. ⁴Baa yuu Samaria yalo para ingyasa.

⁵Yuu Samaria dokona Jekopeme ikinying i Josepe yuu mende maiya dusa ingyuo yuu anda malu palyuo kareng mende kingi Saika lenge dokona epeya. ⁶Jekopena ipwa kamuo nyingi yuwale dokona siyasa Yesu kata pao makapala yuwale repeta dokona peteya. Andawai korakama ingyamopa peteya.^c

⁷Dokopa Samaria enda mende ipwa kamwala epeya. Yesumi baa lamaiyuo, Ipwa narole jii leya. ⁸(Banya disaepole dupwa wambo anda malu palyuo kareng dokona nenge ropo pyala papeyami.) ⁹Dokopa Samaria enda dokome baa dopa lamaiya. Akipamo emba Juu akali dokome namba Samaria enda doŋo ipwa naro jii leene? leya. Juu wambu dupwa Samaria wambu dupwa pipya role pyao kara nange kandale leya. ¹⁰Yesumi isingi dopa lamaiya. Emba Anatumi renge keyange jingi dupwa soo giso apimi ipwa jii letamo lao sipili doko embame baa piso serenepa baame ipwa letena renge palenge lapo jipyali, leya. ¹¹Enda dokome baa lamaiyuo, Aeya, embena pee kamuri doko see nao ipwa kamungi yuwale doko ama kyuwa ingyuo pilya kande dokopa ipwa kyakange doko embame anjarae nyingisi? ¹²Namwana rakange kyawa Jekopeme ipwa kamungi yuwale doko kyasiya dokome baa range ipwa kamuo neyamopa banya ikinying i dupwame nao dee banya bulamakaope opetaeko nao kareyami akali dokopa emba wakasa ingyuo karepe? leya. ¹³Yesumi baa

^c 4:6 Yesumi baa lamaiyuo, Ipwa narole jii leya. (4:7)

dopa lamaiya. Ipwa dakena narami dokopa yango nano nano pira. ¹⁴Ipwa namba mairunu mendeme narami dupwa yango nano ama pii naramopa mona dokona guu lao endangi palyuo karara. Dokome kyakana renge palu palenge dokome baa keta ranjo neta epara leya. ¹⁵Enda dokome baa lamaiya. Aeya, namba ipwa yango nano pii naramopa dee dae kamwala epa nare lao ipwa doko jepe leya.

¹⁶Yesumi baa dopa lamaiya. Emba papala akalinyi kee lapala dee dae epale puu leya. ¹⁷Enda dokome isingi lamaiyuo, Namba akali kara nange leya. Yesumi baa lamaiya. Embame namba akali kara nange lalyane doko kinyi leene. ¹⁸Emba wamba akali kingi paki nyepa pyuo petee, epapu nyuoko petene doko embena akalingi angi daa doko kinyi lalene kandapi, leya. ¹⁹Enda dokome baa dopa lamaiya. Aeya, emba Anatumya poropeta akalilyamo lao soo manji nyilyu. ²⁰Namwana rakange kyawa dupwa yuu kyau dakena Anatu ketae pyambuo yako lao kareyami. Kareyaminyipape Juu nakambame lao dokopa Jerusaleme dokona akali dupwa Anatu ketae pyambuo yako lao karapenge ingilyamo letaminyi, leya. ²¹Yesumi baa lamaiya. Enda, namba kinyi letene lao suu pyaa, yuu gii mende pyaka seramo dokopa yuu kyau dakenape Jerusalemepe dolaponako Rakange doko ketae pyambuo yako lao kararaminde daa. ²²Nakama Samaria wambu dupwame api mende ketae pyambuo yako lao karaminyi doko angi sepala pilyaminde daa. Lete wai pyao nyingi yulu doko namwa Juu wambu dupwa keta epelyamo dokona soo gisapala Anatu ketae pyambuo angingyuo lao karamano. ²³Dopa pyuo karamwanopape yuu gii mende pyaka sera ingyapyamo doko epapu pyaka silyamo dakepa wambu Anatu dokona angi rolae ketae pyambuo yako larami dupwame Rakange doko imambunya kulisa palyuo ketae pyambuo yako larami ingilyamo. Dokonako ingyuo Rakange dokome wambu dopale baa ketae pyambuo kingi lao karamili lao koto karamo. ²⁴Anatu baa imambuŋu dokome wambu baa ketae pyambuo yako lao karaminyi dupwame imambunya kulisa palyuo ketae pyambuo kingi larami ingilyamo leya.

²⁵Enda dokome baa dopa lamaiya. Mesaya (Koraisa lenge doko) epara ingilyamo doko namba silyu. Baa epapala dokopa yulu peparae pano laralyamo leya. ²⁶Yesumi baa lamaiyuo, Embame baa epara lao karene doko epapala pii langyuo karamo leya.

²⁷Gii dokopako banya disaepole dupwa aopa epeyami. Baa enda mendepa pii lao pisambinyilamo lao mona nembeyami. Mona nembeyaminyipape mendeme, Aki nyipuli lao dopa pilinyi? laope, Baapa pii akinya lao petambinyi? laope laa nayami.

²⁸Dokopa enda doko ipwa pee doko yaki nyepala pao anda malu palyuo karenge dokona papala wambu dupwa dopa lamaiya. ²⁹Akalindeme nambana yulu pyuo karenge dupwana peparae polo lalamo doko kandala ipupwa. Baa Koraisape? leya. ³⁰Leyamopa anda

malu palyuo kareng dokona wambu peparae anda yaki nyepala baa kareyamo dokona panya peyami.

³¹Dokopa disaepole dupwame baa piso soo, Rapu Pingi, emba nenge lapo nalase leyami. ³²Leyaminyi dokopa baame nakama lamaiyuo, Namba nenge naro dalapo aeyapyamo peto doko nakama see nalyaminyi leya. ³³Dopa leyamo dokopa disaepole dupwa nakama lao, Mendeme baa nengende minyakamyuo imipi? leyami. ³⁴Yesumi nakama lamaiya. Namba mapanyi peeyamo doko laramuli pyuo pyuo karo banya yulu pyuo kondanyi nembro doko nambana nenge.

³⁵Nakama, Kana kisima epo paparamopa ee jingi lyerama lenge kandale. Ee dupwa epapu dakepa jingi minyngi kondapapyasa lyerama ingilyamo doko lenge pendakae lapala kandalapa. ³⁶Ee range akali nyiso jingi lyakamyuo karamo akali doko epapu yole nyilyamo. Baa jingi lyuo kyakana renge kulisa palu palenge sukusa dokona malu palyuo retelyamo. Dokopa waingi randa lenge akali dokope jingi lyuo karara dokope role pyao raerae maiyuo kararambi ingilyamo. ³⁷Nakamame, Mendeme waingi randa lenge, wakale mendeme jingi lyngi lao kareng kandale. ³⁸Dokoŋo nakama renge pyuo piyaminde daa dokona jingi lyela pupwa leyo. Wambu wakale lapome renge pyuo wara pyuo kareyaminyi apo dokona epapu nakamame lyuo karaminyi leya.

³⁹Enda dokome, Baame namba yulu pyuo kareng dupwana peparae namba kando polo lalamo, leyamosa Samaria wambu malu anda repe repe pyuo kareng range dupwame baa kapa ingingi lao suu pyapala mona maiyami.

⁴⁰Dokopa Samaria wambu dupwame baa kareyamo dokona epapala role pyao karamanale lao baa piso siyaminyisa yuu dokona baa yuu lama kareya.

⁴¹Dokopa banya pii doko sepala wambu konda pyuwale baa kapa ingingi lao suu pyapala mona maiyami. ⁴²Dupwame enda doko dopa lamaiyami. Epapu embena piiko minyuo baa kapa ingingi lao suu pyao karamande daa. Namwa rangeme banya pii soo nyelamano dokona baa angi isa wambu dupwana Lete Wai Pyao Nyingi akali angi ingyuo karamo doko soo gisilyamano, leyami.

⁴³Yuu lama epo papeyamopa yuu doko yaki nyepala baa yuu Galili dokona peya. ⁴⁴Dokona suu pyao Yesumi lao, Anatumya poropeta akali banya yuu range dokona wambu dupwame banya pii doko rape rape lao see nange leya. ⁴⁵Samaria yaki nyepala Galili epeyamo dokopa Galili wambu dupwame yako lao nyiyami. Wamba Jerusaleme dokona nenge nala pao kareyaminyi dokopa baame yulu pyuo kareyamo dupwa peparae kandeyaminyi dokome baa yako lao nyiyami.

Yesumi Gapomane Akali Andake Dokona Wane Pyuo Nyiya

⁴⁶Dokopa Yesumi yuu Kena yuu Galili silyamo dokona wambo ipwa doko nyuo waene ingiya dokona dee epeya. Dokopa yuu Kapaneame

dokona gapomane akali mende kareya dokona ikinyingi doko anga piya. ⁴⁷Yesu Jutia karo Galili dokona ipyalyamo lao sepala akali doko banya wane kwaeyamo siyasa baa kareyamo dokona papala pyuo nyakala lano ipili yaka lao piso sokondali piya. ⁴⁸Dokopa Yesumi baa lamaiyuo, Embame yulu angi andake nolakaenge lapo kanda nare ramo doko Anatu kapa ingingi lao suu pyaa nange leya. ⁴⁹Gapomane akali dokome baa lamaiyuo, Yangone, nambana wane kumapa nana lao lano ipu leya. ⁵⁰Yesumi baa lamaiyuo, Emba paale embena wane lete karara leya. Akali dokome Yesu pii kinyi langyalamo lao suu pyama kata nyuo peya. ⁵¹Baa lano peyamo dokopa banya yulu pingi akali dusipa kandamae nyepala, Embena wane doko kyakapyamo karamo, lamaiyami. ⁵²Dokopa baame, Anjokorape ingyuo baa kyakalana pyase? lao nakama piso siya. Piso siyamo dokopa, Epapu neta dalyasa pakiki palipyamopa wane keloke dokopa yanenge isasa doko pyai napa leyami. ⁵³Rakange dokome gii dokopako Yesumi embena wane doko kyakara lapa kandapi lao soo manji nyiya. Dokopa baa rangemoo banya role paleyami dupwa pipya nakama peparae baa kapa ingingi lao suu pyapala mona maiyami. ⁵⁴Yesumi Jutia yaki nyepala Galili epo karo dokopa yulu doko lapo ingyuo pyuo lasaka piya.

**Yesumi Ipwa Pete Betesaita Lenge Mate
Dokona Akali Mende Pyuo Nyiya**

5 ¹Enakana Juu wambu dupwana nenge nenge yuu gii mende pyaka siyamopa Yesu Jerusaleme dokona lalyuo peya. ²Jerusaleme dokona sipisipi potemo konanda pyuo papingi kambu repeta dokona ipwa pete mende siya. Doko Ipuru pii lao Betesaita lenge. Dokona anda kauwa kingi paki karenge. ³Dusipana wambu anga pyao karalu karengepe lenge koope kimbu kwaengepe papae rambungipi ama malu ipwa doko mole mole minyilyape lao kando iso siyami. ⁴Dokona lao Kamongona aŋala mendeme yuu gii laponu lupyuo pao ipwa pete doko kalumuli pipa piya. Ipwa doko kalumuli pipa piyamo dokona enakana wambu wambo lambwapa piyami dupwa anga rara wakale wakale piyamo dupwa peparae mee ingyapa piya. ⁵Akali mende ee kana akalisa pao akalisa rema ipisu mange lama anga pyao kareyamopa siya. ⁶Yesumi baa kandapala ee kana malu dokona siyamo doko soo gisapala baa lamaiyuo, Emba mee ingyapyamopa karapuli yaka lao suu pilisi? leya. ⁷Anga pingi akali dokome isingi lamaiya. Yangone, ipwa kalumuli pipa pingi dokopa mendeme namba pete dokona lanyuo parami ingya nange. Ene lambuo pao karelyono dokopa mendali wambo pao pyaka napa pingi leya. ⁸Yesumi baa lamaiyuo, Sipurapala embena luu palenge bange doko nyoko minyalu pena, leya. ⁹Leyamo dokopa akali doko aopa mee ingiyamo dokopa banya luu palenge bange doko nyoko minyalu peya.

Yulu doko koro petenge gii dokopa. ¹⁰Juu wambu dupwame akali mee ingiyamo doko dopa lamaiyami. Epapu yuu koro petenge dokopa embena luu palenge bange doko kapa soo paa nare leyami. ¹¹Dopa leyaminipape baame nakama dopa lamaiya. Akali namba pyuo nyipya dokome namba langyuo embena luu palenge bange doko nyoko minyalu puu lapyasa soo pelyo leya. ¹²Nakamame baa piso soo, Embena luu palenge bange doko nyoko minyalu puu lapyasa akali doko apisi? leyami. ¹³Yuu dokona wambu malu kareyamisa Yesu kolala puu pao peyamo dokona akali mee ingiyamo dokome apimi pyuo nyakapyape lao soo gisa naya.

¹⁴Enakana dokopa baa tembole anda dokona kareyamopa Yesumi baa kando nyepala dopa lamaiya. Emba mee ingyapyamopa karene kande. Koo andake mende emba keta dee epa nana lao yulu koo dee kamba pyuo kara napipi leya. ¹⁵Akali dokome pao Juu wambu dupwa lamaiyuo, Namba pyuo nyipya doko kingi Yesu, leya. ¹⁶Dokopa Yesumi koro petenge dokopa yulu dopa piya dokona Juu wambu dupwame baa randa maiyuo kareyami.

¹⁷Dopa piyaminipape Yesumi nakama lamaiyuo, Nambana Rakangeme kaeya napala yulu pyuoko karapyamopa namba yulu pyuo karo leya. ¹⁸Leyamopa baa koro petengena mawa pii doko kokwa siyamo dokona iki baa pyamwali lao suu pyao kareyaminde daa. Baa Anatu doko nambana Rakange leyamo dokopa baapa Anatupa mendarele leyasa piya dokona baa ama pyama lao, lao suu pyao kareyami.

Yesu Keta Yulu Andake Palamo

¹⁹Yesumi nakama dopa lamaiya. Kinyi kinyi langilyu, Ikinyingi baame yeelyo sisu lao mende pii nange. Rakangeme pyuo karenge kandelyamo yulu doko iki kapa pingi. Dokonako ingyuo Rakange pilyamuli pyuo Ikinyingi dokome pyuoko karenge. ²⁰Dokona lao Rakange baame Ikinyingi doko mona reto karapala baame pyuo karenge yulu dupwa peparae lasaka pingi. Enakana dokopa yulu kamame wakasa dupwa lasaka pyuo kararamopa nakama kando yamarangyuo parami. ²¹Dokona suu pyao Rakange dokome wambu kumuo palenge dupwa lete minyalu nyingi doko suu pyao Ikinyingi opetaeme lapo letena renge mairu lao suu pilyamuli pyuo maingi. ²²Rakange baame akali mende kando yapalya yapana pyuo laa nange. Baame wambu yapalya yapana pyuo lenge yulu doko Ikinyingi maiya. ²³Wambu peparame Rakange kando ketae pyambu karaminyi dopako pyuo Ikinyingi ketae pyambu karena lao maiya. Mendeme Ikinyingi kando ketae pyambu kara narami dupwame Rakange mapanyi peeyamo doko ketae pyambu kara naramisa pira.

²⁴Kinyi kinyi langilyu, mendeme nambana pii soo nyepala namba mapanyi peeyamo doko kapa ingingi lao suu pyao karaminyi dupwa keta kyakana renge kulisa doko palira. Kumungi renge doko yalo epo lete

renge dokona karamo dokona baa keta kote pali nara ingilyamo. ²⁵Kinyi kinyi langilyu, yuu gii mende pyaka sera doko pyaka soo kaepyamopa wambu kumuo palaminyi dupwa Anatunya Ikinyingi pii laramo doko sepala lete parami. ²⁶Rakange letena renge renge kuiyuo karamuli pyuo Ikinyingi keta pyamalyiya. ²⁷Baa Ikinyingi Akali ingilyamo dokona lao kote kapa lara inginyi pyambuya. ²⁸⁻²⁹Pii dake sepala mona namba nalapape. Yuu gii mende pyaka seramo dokopa wambu malu anda palaminyi dupwa peparae banya kambu dokona pii neta eparamo doko sepala lopo neta eparami. Wambu yulu keyange pingi dupwa lete karalu karalana lopo epo, wambu koo pingi dupwa kwao parami dokona lao lopo eparami.

Yesu Dokona Api Lao Soo Lao Kareyami

³⁰Namba range sipurapala mende pii nange. Anatu baa namba langinginyili pyuo pakana palyuo kote lao rolenge dokome rolae ingyuo penge. Namba range suu pyao mende pii napala namba mapanyi peeyamo dokona pii sepala pinya lao suu pyao karo.

³¹Namba rangesa lao laro ramo nambana pii doko bulumbulu mee pyara. ³²Mendalimi nambasa lao lao karenge doko banya pii doko pii kinyi lao soo gisilyu. ³³Jone kareyamo dokona lapo piso sela pena leyaminyipa baame pii kinyi dokona rolo leya. ³⁴Rolo leyamopape isa akalimi namba nyiso pii mende lamilinya suu pyaa nalyo. Pii doko nakama lete wai pyao paramiŋi lao karo. ³⁵Jone baa isareŋe rao sinyi piyamosa nakama dokona karalana rae maiyuo kareyami. ³⁶Dopa piyamopa nambame pii lao karenge dokome Jonena pii doko anale palamo. Dokona lao Rakange dokome yulu pyuo lumwa pipi lao jiyamo nambame pyuo karo dupwameko Rakange dokona namba mapanyi peeyana lao lasaka pilyamo. ³⁷Doko Rakange namba mapanyi peeyamo dokome nambana lao lakaya. Banya pii lumbuo epenge doko nakamame see nange. Banya apiyakale lao nakamame angi kanda nange. ³⁸Baame mapanyi peeyamo dokona pii doko soo nyii nalyaminyi renge dokona banya pii nakamame monarena pali napyasa karaminyi. ³⁹Buku Baepole dokona letena renge kulisa kando nyerama lao suu pyapala nakama yaka letaminyi. Pii pyasi palipyamo yaka letaminyi doko nambasa suu pyao lenge. ⁴⁰Yaka letaminyipape letena renge doko karo namba piso sela epa nalyaminyi.

⁴¹Isa akali dupwame namba lakandamili yaka lao suu pyao kara nalyo. ⁴²Doko nakamana monarena Anatunya mona retenge renge doko pali nalyamo doko soo gisilyu. ⁴³Nambana Rakangena kingi lao ipunupa namba yako lao nyii nalyaminyi. Mendeme banya rangena kingi lao epara ramo doko baa yako lao nyerami ingilyamo. ⁴⁴Yango nakamana kingi wambu yangome ketae pyambu karamili yaka lao suu pyao

karaminyipape Anatu mendaki karengé dokome nakamana kingi ketae pyambuo karapyali lao suu pyao kara nalyaminyi. Dokona lao nambana pii dupwa soo nyii narami ingilyamo. ⁴⁵Nambame nakama rakangena lenge kambu dokona karo kote lare lao suu pyaa nalapape. Mosese nakamame suu pyao karaminyi dokona baame nakama kando kote palyuo karara ingilyamo. ⁴⁶Mosesena pii piyamo doko kinyi lao siyamili doko baame nambana lao piyara piyara dokona namba kinyiingi lao soo nyimili. ⁴⁷Dokona suu pyao banya pii pyasi palenge dupwa kinyilyamo lao suu pyaa narami ramo dokopa apa pyuo nambana pii dupwa kinyilyamo lao suu pyaramisi? leya.

Yesumi Yulu Andake Pyuo Wambu 5,000 Nenge Maiya

(Mat 14:13-21; Mak 6:30-44; Lu 9:10-17)

6 ¹Dopa lapala Yesu ipwa Galili pete kingi Taipiriasa lenge dokona dumuwangu peya. ²Dokopa anga pingi wambu dupwa keta yulu andake pyuo lasaka pipa pyuo kareyamo kandapala wambu ama malu baa peyamo dokona enakana peyami. ³Yesu yuu kyau pyala pyana pyuo karengé dokona pulyuo pao banya disaepole dupwa pipya peteyami. ⁴Juu wambunya nenge nenge Pasopa doko repetale pyaka siya. ⁵Dokopa lenge pendekae lapala baa peteyamo dokona wambu ama malu dupwa epeyaminyi kandapala Yesumi Pilipa lamaiyuo, Wambu dupwa nenge narami lao borete apa pyuo ropo pyaramase? leya. ⁶Yesumi mende piru lao suu pyapala Pilipa baame mee apa letape lao selena makande pyuo leya. ⁷Pilipame baa isingi lamaiya. Kana 200 nyepala borete ropo pyao nyeramanopape wambu mendemepe kolekole pyuo nao pao suu larami ingya nalyamo, leya. ⁸Banya disaepole kareyami dokona mende Enduru Saimone Pitana yangonge dokome baa lamaiya. ⁹Wane mende dae karamo borete bali jingi dokome wasisi kingi pakipi oma lamape minyilyamo. Wambu ama malu karaminyi doko suu pyao dusipa iki apa pyuo kau lao mairamase? leya. ¹⁰Leyamopa Yesumi, Wambu dupwa isa petena lalapape leya. (Yuu dokona rambi malu paleya.) Dokona akali akalisa pao kingi paki daako ama malu wakasa (5,000) ingyuo isa peteyami. ¹¹Dokopa Yesumi borete dusipa nyepala ange lao atepa lapala isa peteyami dupwa mokwa soo maiya. Dopako pyuo oma opetae naraminyili pyuo maiya. ¹²Maiyamopa nao sikya piyamo dokopa baame banya disaepole dupwa dopa lamaiya. Mee raeyo see nana lao nao malasi silyamo dupwa yapo nyelapape leya. ¹³Dokopa borete bali jingi dokome wasisi kingi paki dusipa nao malapala nembeyami dupwa yapo nyuo pisiki minyasi akalisa ipisu lama dusipana paki pyuo simbuo pyoko pyoko leyami.^d

^d 6:13 Maiyamopa nao sikya piya. (6:12)

¹⁴Yulu andake dopa pyuo lasaka piyamo kandapala dokopa wambu dupwame Anatumya poropeta akali isa yuu dakena epara ingilyamo doko akali dakelamo leyami. ¹⁵Banya isingi yulu pyuo karalase lao puu maiyala epanya piyaminyi kandapala yuu kyau pyalya pyana piyamo dokona baa yeelyo nyokonyuo peya.

Yesumi Ipwa Ketae Yana Yana Peya
(*Mat 14:22-33; Mak 6:45-52*)

¹⁶Yuu kwualepalepa dokopa banya disaepole dupwa ipwa muiyane pete siyamo dokona lupyuo peyami. ¹⁷Papala bote dokona pyakambuo pao pisipala yuu Kapaneame dokona panya ipwa pete suku suku peyami. Dokopa iminjareyamopa nakama peyami dokona Yesu ene epapa naya. ¹⁸Dokopa porambaiye andake minyapala ipwa doko pyakalya pyakana piya. ¹⁹Nakamana bote doko yulu pyuo kilomita pakinyamange ingyuo peyaminyi dokopa Yesu ipwa dokona yana yana epo bote repeta epeyamo kandeyami. Kandapala pakayami. ²⁰Dokopa baame nakama lamaiyuo, Dake namba ipunu pilyamo. Paka nalapape leya. ²¹Dokopa nakamame rae maiyuo baa bote dokona yako lao nyiyami. Dokopa nakama yuu panya epeyami dokona bote doko aopa epo pyaka siya.

Wambu Dupwame Yesu Koteyami

²²Dokona yangama dokopa ipwa muiyane pete dorena wambu mee kareyami dupwame bote mendaki iki sipyamopa Yesu banya disaepole dupwa role pyao bote dokona paa napyamopa banya disaepole dupwa yeelyo kanjakala pumilyamo lao suu piyami. ²³Dee bote Taipitiasa range lapo epo Kamongo dokome atenja leyamopa borete nao peteyaminyi mare dokona repeta epo siyami. ²⁴Dokopa wambu dupwame Yesu banya disaepole dupwa pipya kara nayami doko kandapala bote dusipana nakama pyakambuo pao pisapala Kapaneame dokona Yesu kotala peyami.

Yesu Baa Yake Pandana Nenge Angingyuo Karenge

²⁵Enakana Yesu pete dumuwangu kareyamo kando nyepala baa lamaiyuo, Rapu Pingi, anjokorape dae ipisi? leyami. ²⁶Yesumi nakama isingi lamaiyuo, Kinyi kinyi langilyu, yulu andake lasaka pipunu kandami dokona namba koto epa nalaminyi, Nakamame borete nao sikya pyuo puminyi renge dokona namba koto epeyaminyi. ²⁷Nenge rumbyara ingilyamo dupwa nyelana yulu pii nalapape. Nenge oo korokoro sulu soo sera doko nyelana yulu pipwape. Nenge doko Ikinyingi Akali dokome nakama jera. Dokona lao Rakane Anatumi baa rombo palyiya leya. ²⁸Leyamopa nakamame, Namwa Anatumya yulu dokona apa pipala piramase? leyami. ²⁹Yesumi nakama isingi lamaiyuo, Anatumi mapanyi peeyamo doko kapa ingingi lao suu pyapala

mona mairami yulu dokoko Anatumi pimili lao suu pilyamo leya. ³⁰Dokopa nakamame baa lamaiyuo, Dopa lalyane dokona suu pyao aki yulu andake mende namwa pii kinyi lalyane lao suu pyalapape lao lasaka pirisi? Embame aki yulu pingisi? ³¹Namwana rakange kyawa dupwame yuu muiyane dokona nenge kingi myana lenge doko nao kareyami. Dokona suu pyao pii dopa lao pyasi palamo. Borete yake panda rae nena lao maiya leyami. ³²Dokopa Yesumi nakama dopa lamaiya. Kinyi kinyi langilyu, Moseseme borete yake panda rae doko nakama angi ingyuo jiyande daa. Nambana Rakangeme borete angi yake panda rae angi ingyuo joo karenge. ³³Dokona suu pyao Anatunya borete yake panda rae isa panda epeya dokome isa wambu kyakana renge doko joo karamo leya. ³⁴Nakamame baa lamaiyuo, Kamongo, embame borete doko yuu peparae joo karape leyami. ³⁵Yesumi nakama dopa lamaiya. Borete letena renge palenge doko namba karo. Mende namba karo dokona eparamo dokopa dee lopa nara. Mende namba kapa ingingi lao suu pyara dokome dee ipwa nano pii naramo karara.

³⁶Nakamame namba lengeme kandapala kando kaeyo kinyi lalyane lao suu pyaa nalyaminyi langyalono kandapi. ³⁷Rakaneme wambu namba jeramo dupwa peparae namba kararo dokona eparami. Dokopa mende namba kararo dokona epara ramo doko nambame ramanyi namba naro. ³⁸Dokona lao namba yake panda karapala isa epo dokopa range suu piyunuli pyuo pila epeyonde daa. Namba mapanyi peeyamo dokome laramuli pyuo pyuo karala epeyo. ³⁹Namba mapanyi peeyamo dokome baame namba jeramo dupwana mende pyakuiyaka naramopa yuu gii otaramo dokopa minyalyuo nyere lao manjo karamo. ⁴⁰Dokona lao nambana Rakange dokome wambumi Ikinyingi doko kandapala baa kapa ingingi lao suu pyapala mona mairami dupwa peparae keta letena renge kulisa palu palenge doko palira lao suu pyao manjo karamo. Yuu gii otaramo dokopa nambame nakama minyalyuo nyero, dokoŋo leya.

⁴¹Baame, Namba borete yake panda rae lupyuo epeyo leyamo dokona Juu akali dupwame baa kando mumu leyami. ⁴²Baa Josepena ikinyingyi Yesu lenge banya rakange endangipa dolapo namwame kando soo gisingi doko daande lyasilisi? Dokona epapu apa pisala namba yake panda karo lupyuo epeyo letase? leyami.

⁴³Yesumi nakama isingi lamaiya. Nakama mumu laa nalapa. ⁴⁴Rakange namba mapanyi peeyamo dokome kiyango pii nara ramo doko wambu mende namba karo dokona epanya saka nara. Epara ramo doko yuu gii otaramo dokopa nambame baa minyalyuo nyero. ⁴⁵Anatunya poropeta akali dupwame pepana pii mende pyao reteyami. Doko wambu peparae Anatunya mana nyerami ingilyamo, lao palamo. Rakange dokome mana lamailyamosa singi wambu dupwa peparae namba karo dokona epenge. ⁴⁶Wambu lapome Anatu kandenge dokonasa lao kara nalyo. Anatu mapanyi peeyamo doko iki baa kandenge.

⁴⁷Kinyi kinyi langilyu, wambu namba kapa ingingi lao soo kareng
dupwa keta letena range palu palenge. ⁴⁸Namba lete palenge dokona
nenge angi doko karapunu pilyamo. ⁴⁹Nakamana rakange kyawa
dupwame yuu muiyane dokona nenge myana lenge doko nao karo
pao kumuyami. ⁵⁰Borete dake yake panda rae epelyamo doko akali
mendeme naramo dokome kuma nara. ⁵¹Namba borete letena renege
palenge yake panda rae karo. Wambu mendeme borete dake nara
ramo doko baa karalu karara. Nambame isa wambu dupwa lete karalu
karamili lao suu pyapala nenge borete makande pyuo nambana yongo
mairu leya.

⁵²Dokopa Juu wambu dupwame nakama lao apiyanda pyuo karo,
Akali dake apa pyuo banya yongo doko nalapape lao jerase? leyami.
⁵³Dokopa Yesumi nakama dopa lamaiya. Kinyi kinyi langilyu, Ikinyingi
Akali dokona yongo dokoepo ranjama dokoepo naa narami ramo doko
nakama keta letena renege pali nara. ⁵⁴Wambu nambana yongo dokoepo
ranjama dokoepo nelyaminyi dupwa keta letena renege palu palenge.
Yuu gii otaramo dokopa nambame baa minyalyuo nyero. ⁵⁵Dokona lao
nambana yongo dokoepo nambana ranjama dokoepo nenge kulisa ingyuo
pelyamo. ⁵⁶Wambu mendeme nambana yongo dokoepo nambana ranjama
dokoepo narami ramo dupwa nambana arapu dokona kararaminyipa
nambame nakama keta maralyuo kararo. ⁵⁷Lete kareng Rakange
dokome namba mapanyi peeyapala dokome lete karo. Dopako pyuo
wambu namba narami dupwa namba keta lete kararami leya. ⁵⁸Borete
dake yake panda rae epeya doko. Rakange kyawa dupwame napala
kumuyami dopale daa. Wambu mendeme borete dake narami dupwa
lete karalu kararami leya. ⁵⁹Baa Kapaneame dokona mana lao karo
dokopa sinakoke anda dokona karo leya.

Yesumi Letena Renge Palu Palenge Pii Doko Polo Lamaiya

⁶⁰Banya disaepole wambu kareyami dupwana malumi pii doko
sepala, Pii doko kapa ingya nalyamo. Apimi kapa soo pisirase? leyami.
⁶¹Dopa leyaminyipape Yesumi disaepole dupwame pii dokona mumu
lalyaminyi lao monarena soo manjipala nakama dopa lamaiya. Pii doko
awa nalyamipi? ⁶²Doko Ikinyingi Akali wamba kareyamo panda dokona
dee pulyuo paramo doko kandarami ramo doko apa lao suu pyaramipi?
⁶³Wambumi imambu paliramopa lete kareng. Yanenge yeelyo dokona
renge mende pali nalyamo. Pii langyalono dupwa imambunya pii
ingilyamo dokome soo nyepala lete parami. ⁶⁴Nakama karaminyi
dupwana lapo kinyi lalenelyamo lao suu pyaa nao karaminyi leya.
Wambu angi suu pyaa nao kareyami dupwape baa matarena isakalya pira
ingiyamo akali dokoepo wamba kanda soo dokopa soo kaeyo kareyamo
dokome leya. ⁶⁵Lapala baame dopa leya. Renge dokona lao Rakange

dokome kapa laa nara ramo doko mende namba karo dokona epanya saka nara lalono leya.^e

⁶⁶Dopa leyamopa enakana banya disaepole kareyami dupwana malu nyokonyuo kaepala dee kamba baa role pyao papa nayami. ⁶⁷Yesumi akali akalisa ipisu lama kareyami dupwa lamaiyuo, Nakama opetae nyokonyuo kaepala paramisi? leya. ⁶⁸Saimone Pitame baa isingi lamaiya. Kamongo, api karara dokona paramase? Embame letena renge kulisa palu palenge dokona pii lao karapinyipa, ⁶⁹namwame emba kapa ingingi lao suu pyapala emba Anatumya Poo Pyasi dokolyamo lao soo nyepala karamano leya. ⁷⁰Yesumi nakama isingi lamaiya. Nakama akali akalisa ipisu lama karaminyi dupwa nambame yapalyuo nyiyunu dokona mende imambu koo daande lyasilisi? leya. ⁷¹Jutasa, Saimone Isakeriote ikinyingi dokome baa matarena isakalya pira ingiyamo dokonasa leya.

Yesunya Yangonge Dupwame Nenge Pasopa Nala Mwua Leyami

7 ¹Enakana Yesu yuu Galili dokona papyuo kareya. Jutia wambu dupwame baa pyao kumakalana pyuo kareyami dokona baa yuu Jutia dokona papyuo kara naro lao suu piya. ²Juu wambu dupwame komaume kauwa anda pipala palyuo nenge nenge gii doko pyaka selana piya. ³Dokopa banya yangonge dupwame baa lamaiyuo, Embena disaepole dupwame embena yulu pyuo karene dupwa kapa kandarami lao dae yaki nyepala Jutia dokona pupi. ⁴Dokona lao akali mendeme banya kingi londena lao suu pyara ramo doko baa yalu pyuo pyuo kara nara. Yulu dupwa pyuo karare ramo isa wambu dupwame kandena lao pyuo neta pyape leyami. ⁵Banya yangonge dupwame opetaeko baa kapa ingingi lao suu pyaa nayami. ⁶Yesumi nakama lamaiyuo, Nakamana yuu gii malu sipyamopa nambana yuu gii doko pyaka sepa nalyamo. ⁷Isa wambu dupwame nakama kando awa naa narami. Nambame isa wambu dupwame yulu koo pyuo karenge lao karo dokona namba awa nao karaminyi. ⁸Nakama range nenge narami dokona pupwape. Nambana yuu gii pyaka sepa nalyamo dokona nenge narami dokona namba epapu paa naro leya. ⁹Lapala yuu Galili dokona mee kareya.

Yesumi Komaume Kauwa Anda Pipala Palyuo Nenge Nenge Dokona Kareya

¹⁰Mee karapala banya yangonge dupwa nenge narami dokona lalyuo papeyaminyipa baa opetae kata mendena kolalyuo peya. ¹¹Nenge nao kareyami dokona Juu wambu dupwame baa anja karamo lao koto kareyami. ¹²Dokopa mee wambu dupwame baasa kando mumu mamu lao lapome, Baa akali keyange, leyaminyipa lapome, Daa baame mee

^e 6:65 Nakama opetae nyokonyuo kaepala paramisi? leya. (6:67)

wambu dupwa suu longo nyuo karamo, leyami. ¹³Leyaminyipa Juu wambu dupwa kando pakapala pii pyakamo laa nayami.

¹⁴Nenge nao suku suku paleyami dokopa Yesu tembole anda dokona lalyuo pao mana lao kareya. ¹⁵Juu wambu dupwame dopa pyuo kareyamo kando ayaka lao dopa leyami. Akali dake sukuli laa nange dokona apa pyuo soo gisilyase? leyami. ¹⁶Dokopa Yesumi nakama isingi lamaiyuo dopa leya. Namba mana lao karo pii doko nambana daa. Doko namba mapanyi peeyamo dokona. ¹⁷Akali mende baa laramuli pyuo pyuo karapuli lao suu pyara ramo doko mana pii doko Anatunya panda nambame iki sisu lao letepe lao soo gisara. ¹⁸Mendeme sisu lao pii lara ramo doko baa range lakandamili lao suu pyao larasa pira. Dopa piramopape akali mendeme mapanyi peeyamo akali doko kando lakandamili lao suu pyao karara ramo doko akali angingyuo kararamopa baa keta panga singi yulu doko pali narasa pira. ¹⁹Moseseme Mawa Pii doko nakama jii nayase? Jiyamopape nakama karaminyi dupwana mendeme Mawa Pii doko minya nange. Akipamo nakamame namba pyao kumakalana lao suu pyao karamisi? leya. ²⁰Wambu dupwame isingi lamaiyuo, Emba keta imambu koo mende palamo. Apimi emba pyao kumakalana lao suu pyao karamisi? ²¹Yesumi nakama isingi dopa lamaiya. Nambame yulu mendaki pipunusa mona nembo karaminyi. ²²Moseseme yanenge awali lao pyakepanyi nembenge yulu doko jiya kande. (Doko Mosese baame angi jii nayamopa rakange kyawa dupwame jiyami.) Jiyaminyipa nakamame koro petenge dokopa wanena yanenge awali lao pyakepanyi nembenge. ²³Koro petenge gii dokopa Mosesena Mawa Pii doko kokwa see nao akalinya yanenge doko awali lao pyakepanyi nembarami ramo doko nambame koro petenge dokopa akali mendena yanenge peparae elya pipu doko kando akipamo namba keta imbua karamisi? ²⁴Yanengena ketae yulu doko kando yapalya yapana pyuo suu pyao kara napala renga angi rolae yapo nyuo suu pyao karalapape leya.

Yesu Baa Koraisape Daase Lao Soo Pakana Palya Nayami

²⁵Dopa lao kareyamo dokopa Jerusaleme range wambu lapome dopa leyami. Akali pyalana lao lomo karaminyi baa doko daase? ²⁶Dopa pilyaminyi doko baa dae pii lao panembena karapyamopa nakamame baasa kando pii mende laa nalyaminyi. Akali mupwa dupwame baa Koraisa angingyuo karamo lao soo gisapala kaelyamipi? ²⁷Dopa pipyamopape akali dake anja karo epeya lao soo gisilyamanopape Koraisa angi doko panaramo dokopa wambu mendeme baa anja karo epara lao see narama leyami.

²⁸Dopa leyami dokopa Yesu tembole anda dokona mana lao karo dokopa pii ketae palyuo dopa leya. Nakamame namba kando anja karo

epee lao soo gisilyamisi? Dopa pyaaminyiko doŋo nambame sisu lao epeyonde daa. Namba mapanyi peeyapala angingyuo karamo doko nakamame kando see nalyaminyi. ²⁹Baame namba mapanyi peeyamo dokona karo epeyo dokome nambame baa kandenge leya. ³⁰Dokopa nakamame baa puu maiyalana suu pyao lao kareyaminyipa banya yuu gii doko ene pyaka sepa nayamo dokome wambu mendeme baa minyara nayami. ³¹Minyara nayaminyipa wambu malu meeme baa angini lao suu piyami. Akali dake yulu andake malu lasaka pyuo karamo doko Koraisa eparamo dokopa yulu kamame wakasa lasaka pyuo kararase? leyami.

Yesu Puu Mailana Pyuo Kareyami

³²Wambu malu mee pii dopale yalu pyuo lao kareyaminyi doko sepala Parisi akali dupwame purisi akali mupwape nakamana yanda singi lapo Yesu puu maipala nyela pena leyami. ³³Dokopa Yesu dopa leya. Yuu mendasipa iki dee nakama pipya kararama. Karapala namba mapanyi peeyamo karamo dokona paro. ³⁴Nakamame namba koto karapala kando nyii narami. Namba kararo dokona nakama epana saka narami leya. ³⁵Juu wambu dupwa yango sukusa dopa leyami. Namwame baa kando nyii narami lao anja paro lao suu pyao letase? Yuu kipwa kipwa Giriki wambu karenge dupwana Juu wambu lapo bolombalo lao papala karaminyi dupwana pao Giriki wambu dupwa mana lamairu lao panya karape? ³⁶Baame, Namba kotapala kando nyii narami lapala kararo dokona epana saka narami, lalamoko kandapi doko aki rengendena lalape? leyami.

Yesumi Wambu Dupwa Pii Polo Lamaiya

³⁷Nenge nao kareyami yuu dusipana lumwa pingi yuu gii wakasa dokopa Yesu sipurapala pii ketae palyuo dopa leya. Wambu mendeme ipwa nano pyuo karara ramo doko namba karo dokona ipupwape. ³⁸Mendeme namba kapa ingingi lao suu pyaramo doko pii pyasi palengenyili pyuo banya monarena kyakana renge palenge ipwa guu lao pyasumakao karara leya. ³⁹Dopa lao wambu baa kapa ingingi lao suu pyao kareyami dupwame Imambu ene nyerami dokonako palyuo kongwalu pii leya. Anatumi Yesu ene yanga paupau lanyi pyambwapa nayamosa Imambu doko maipa naya.

Wambu Dupwame Yesu Kando Wakale Wakale Lao Suu Pyao Kareyami

⁴⁰Pii leyamo doko sepala wambu lapome, Akali dake Anatunya pii nolako lenge akali angi ingilyamo leyami. ⁴¹Lapome, Dake Koraisalamo leyami. Leyaminyipa lapome, Koraisa baa yuu Galili rae epara ingilyase? ⁴²Koraisa Dapitinya para pyasi ingyuo yuu Beteleme taone Dapiti paleya dokona rae epara ingilyamo lao pii pyasi dokona pali nalyase?

leyami. ⁴³Mee wambu dupwa dopa lao baa kando wakale wakale suu pyao kareyami. ⁴⁴Lapome baa puu maimwali yaka lao suu pyao kareyaminyipa mendeme baa minyara nayami.

Juu Mupwa Dupwame Yesunya Pii Soo Nyii Nayami

⁴⁵Yanda singi dupwa purisi mupwa Parisi dupwape kareyami dokona laeyo epeyaminyipa nakamame, Akipamo baa lanyuo epa nalamisi? lamaiyami. ⁴⁶Yanda singi dupwame isingi lao, Baa letamo akali mendeme dopakale ingyuo laa nange leyami. ⁴⁷Parisi akali dupwame nakama lamaiyuo, Nakama opetaeko kyambo langalase? ⁴⁸Akali angi dupwape Parisi akali dupwape karaminyi dokona mendeme baa kapa ingingi lao suu pyao karamisi? ⁴⁹Doko wambu nakama lyingi lyangi kuiyuo karaminyi dupwame Mawa Pii see nao karaminyi dokome nakama keta koo palira ingilyamo leyami. ⁵⁰Leyaminyipape nakama dokona akali mende Nikotimasa lenge baa wambo Yesu kandala peya akali dokome sipurapala dopa leya. ⁵¹Namwana Mawa Pii palamo dokona, Namwame akali mende koo pipyalyamo lapala mee langa kote laa nange. Dopa pipyalyamo lao piso soo otapala kote lenge. ⁵²Nakamame, Emba opetae Galili rangekose? leyami. Pii pyasi dupwa poraiyuo mana nyuo kandarenepa Galili range poropeta mende sipura nara ingilyamo lao kandare leyami.

Endame Kepo Piyamo Dokona Kote Leyami

8 ¹Wambu peparae anda peyaminyi dokopa Yesu yuu Olipi Kyau dokona peya. ²Wamba yangama dokopa tembole anda dokona dee kamba epeya. Wambu peparae baa kareyamo dokona epeyaminyipa baame isa pisipala mana lamaiya. ³Dokopa enda mende akali kepo pyuo palipyamopa kando nyiyami doko Mawa Pii mana lengepe Parisi dupwapeme baa nyepala lanyuo epeyami. Lanyuo epo wambu peteyami dokona enda doko sukusa roya kareyami. ⁴Dopa pipala Yesu dopa lamaiyami. Mana Lenge, enda dake akali kepo pyuo palipyamopa kando nyelaminyi lyakande. ⁵Moseseme Mawa Pii pyao reto, Dopale pingi dupwa kaname pyao kumakalapape leya kande. Embame baasa kando apa lare? leyami. ⁶Yesu koo mende larape lao kote lamwali yaka lao suu pyapala baa apa letape lao selana makande pyuo leyami. Dokopa Yesu pongwa napala kingi kyawa dokome yuu dokona kiki pyuo peteya. ⁷Dokopa nakamame baa piso soo lao sulu siyami dokopa baame roya karapala nakama lamaiyuo, Nakama karaminyi dokona mende koo pali naya kande doko wambo sipurapala enda baa kaname pyalase leya. ⁸Lapala dee kamba pongwa napala yuu dokona kingi kyawa dokome deeyako kiki pyuo peteya. ⁹Dokopa pii leyamo doko sepala nakama mendaki mendaki lao andapae dupwa wambo peyaminyipa pao karo ote

leyami. Dopa piyaminyi dokopa Yesu enda dokopa yeelyo kareyambi.
¹⁰ Yesu baame kandalyuo kandapala, Enda, wambu lao karalaminyi
 kandapi dupwa anjukunya kata pamipi? Nakama mendeme emba kote laa
 naramipi? leya. ¹¹ Baa, Kamongo lapala, Mendeme laa naramilyamo leya.
 Dokopa Yesumi lao, Namba opetaeme emba koo pinginji laronde daa.
 Papala deeko kamba koo pyuo pisa napipi leya.^f

Yesu Baame Isa Wambunya Yanga Paupau Lenge Renge Ingyuo Karenge

¹² Yesumi nakama dee mende lamaiyuo dopa leya. Namba isa yuunya
 yanga paupau lenge renge karonjo. Mendeme namba paronuli pyuo
 eparamo doko baa iminjinginya moko palyuo papi napala baa keta letena
 yanga paupau lenge renge doko palira leya. ¹³ Dokopa Parisi dupwame
 baa lamaiyuo, Emba rangeme namba dopa pyuondeje leene pii doko
 kinyi daa, leyami. ¹⁴ Yesumi isingi dopa leya. Namba rangena yulu
 suu pyao lapunupape nambana pii kinyi ingyuo pelyamo. Namba anja
 karo epeyo lao anja paro lao soo gisapala lao karo. Soo gisapunupape
 nakamame namba anja karo epee lao anja pare lao soo walengena palya
 nalyaminyi. ¹⁵ Nakamame yanengena ketae kando koo epengepe yapalya
 yapana pyuo lenge. Namba wambu koo epengepe yapalya yapana pyuo
 lao kara nalyo. ¹⁶ Lao kara nalyonjo doko namba koo epengepe yapalya
 yapana pyuo lao kararo ramo doko namba iki laa nao karo namba
 mapanyi peeyamo dokopa laramba dokome rolae laro. ¹⁷ Nakamana Lowa
 dokona akali lamame mendakinya palyuo lao kararambi ramo doko pii
 kinyilyamo lao suu pyarami lao pyasi palamo kande. ¹⁸ Namba rangeme
 dopa pyuondeje lao karonopa Rakange dokome namba dopa pyuondeje
 lao karengeko leya. ¹⁹ Dopa leyamo dokopa nakamame baa lamaiyuo,
 Embena rakane anja karamo? leyami. Yesumi isingi lao, Namba kando
 soo rola naminyi doko suu pyao Rakange baa soo rola nalyaminyiko.
 Namba soo rolamili doko nambana Rakange baa opetae simili, leya.^g

²⁰ Baame tembole anda dokona mana lamaiyuo karo dokopa kana mone
 retapa pingi anda dokona karo pii dasipa lao kareya. Lao kareyamopape
 banya yuu gii ene pyaka sepa nayasa mendeme baa puu mai nayami.^h

Yesumi Juu Wambu Kando Namba Paronuli Pyuo Epa Narami Leya

²¹ Yesumi dee pii mende lamaiyuo, Namba mendasa paronopa
 nakamame namba koto karo nakamana koo dupwa paleta kumarami.
 Namba parono dokona kapa epa narami leya. ²² Dokopa Juu wambu
 dupwame lao, Baa paro dokona kapa epa narama letamo doko rangeme

^f 8:11 Enda mende akali kepo pyuo palipyamopa baa nyepala lanyuo epeyami. (8:3)

^g 8:19 Yesu kingi kyawa dokome yuu dokona kiki pyuo peteya. (8:6) ^h 8:20 Mendeme
 emba kote laa naramipi? leya. (8:10)

pyapala kumuo parape? leyami. ²³Baame nakama dopa lamaiya. Nakama isa panda rae, namba ketae panda rae, nakama isa yuu dakena range, namba isa yuu dakena rangende daa. ²⁴Nakamame namba Baana lao suu pyaa narami ramo doko yulu koo pyuo karaminyi dopako pyuo karo kumarami ingilyamo. Dokona lao nakama koo paleta kumarami langyalono kandapi leya. ²⁵Nakamame baa lamaiyuo, Emba apisi? leyami. Yesumi nakama lamaiya. Wamba kanda soo piso langyuo kareyo kande dokoko. ²⁶Nakamasa lao koo koo lao pii malu laro ingilyamo. Ingyapyamopape namba mapanyi peeyamo doko kinyi angi lao karapyamopa baame namba pii langiyamo siyunuli pyuo isa wambu dupwa polo langyuo karo leya.

²⁷Baame Rakangesa lalyamo lao soo gisa nayami. ²⁸Dokopa Yesu dopa leya. Ikinyingi Akali minyalyuo nyerami dokopa namba Baana lao soo manji nyerami. Namba range sisu lao mende pii nao Rakange dokome mana langiyamuli pyuo lao karee lao soo gisarami. ²⁹Namba mapanyi peeyamo doko nambapa karambano. Yuu peparae nambame baa rae mairali yulu dupwa pingi dokome namba yaki nyii nao karamo leya. ³⁰Dopa lao kareyamo dokopa wambu malumi baa kapa ingingi lao suu pyapala mona maiyami.

Moko Nyisi Puu Maisi Karengape Dupwana Pii Lapo

³¹Dokopa Yesumi Juu wambu baa kapa ingingi lao suu pyao kareyami dupwa dopa lamaiya. Nakamame nambana pii kare kare soo soo kararami ramo doko nambana disaepole angingyuo kararamisa pira. ³²Dokopa pii angi kinyi doko soo gisaraminyisa pii kinyi dokome nakama kiiramo neta nyera leya. ³³Nakamame baa lamaiyuo, Namwa Aporakamena para pyasi ingyuo karamano. Yuu wamba akali mendeme puu maiyamopa kara nayama. Kiiramo neta nyera lalene kandapi doko apa piyandena lalase? leyami.

³⁴Yesumi isingi dopa lamaiya. Kinyi kinyi langilyu, wambu yulu koo pyuo karengape dupwa peparae koona kendemande ingyuo karaminyi. ³⁵Kendemande akali mendeme mende nyiso karara ramo doko banya ree palu ingyuo puu pao paa nara. Ikinyingi dokome angingyuo karalu karara. ³⁶Dokona Ikinyingi dokome nakama kiiramo nyera ramo doko nakama kinyi kinyi moko nyisi kararami. ³⁷Nakama Aporakamena para pyasi ingyuo karaminyi doko silyu. Silyuko dojo nambana pii doko soo nyii nalyaminyi dokona nakamame namba apa pyuo pyamane lao karaminyi. ³⁸Nambana Rakangena lenge kambu dokona kandeyonuli pyuo lao karo, nakamame nakamana rakangape langilyamo nyili pyuo pyuo karengape leya.

³⁹Dokopa nakamame baa lamaiyuo, Aporakame baa namwana rakangape kandale leyami. Yesumi nakama dopa lamaiya. Nakama

Aporakamena wane pili doko baa pyuo kareyamo doko suu pyao pyuo karamili. ⁴⁰Dokonako ingyuo Anatumi pii kinyi langiyamo doko nakama langipunupa nakamame namba apa pisala pyapamape lao karaminyi. Yulu dopale Aporakame pii naya kande. ⁴¹Nakamana rakange pyuo kareyamuli pyuo nakamame pyuo karaminyi leya. Nakamame baa lamaiyuo, Namwa Anatu kaeyapala kura ipwa likya likya ingyuo kara nalyamano. Namwana Rakange mendaki angi doko Anatuko karenge leyami. ⁴²Yesumi nakama lamaiyuo, Anatu nakamana Rakange ingyapyali dokome namba mona retamili. Dokona lao Anatunya arokwa dokona karo epeyo. Namba rangeme sisu lao epeyonde daa. Baame namba mapanyi peeyamosa epeyo. ⁴³Namba lao karo doko akipamo soo gisa nalyamisi? Nakamame nambana pii doko selana epe nasingi dokona soo manja nalyaminyi. ⁴⁴Nakamana Rakange Satane dokona rango doko napala pyuo karamwali lao karaminyi. Baame ene busiyamo dokona piso epo wambu pyao kumakao kareyamoko karenge. Baa keta pii kinyi doko pali nalyamosa baame pii kinyi dokona mende suu pyao lara ingya nange. Baa renge kuiyuo kyambo lenge dokome kyambo lengena rakange kyawa ingyuo karamo. ⁴⁵Dopa pipyamopape nambame nakama pii kinyi langilyu dokona pii kinyilyamo lao suu pyaa nalyaminyi. ⁴⁶Nakama karaminyi dokona api mendeme namba kando koo piinyi kandeyo lao kapa neta pyaramisi? Namba pii kinyi laro ramo doko akipamo nambana pii kinyilyamo lao suu pyaa nalyamisi? ⁴⁷Anatunya ingyuo karaminyi dupwame Anatunya pii dupwa soo karenge. Nakama Anatunya ingyuo kara nalyaminyi dokona namba soo kara nalyaminyi leya.

Api Mupwa Yesu Panda Aporakame?

⁴⁸Juu akali dupwame baa lamaiyuo, Emba Samaria akali ingyuo imambu koo mendeme maralyipyamo karene lalamano doko kapa laa nalyamase? leyami. ⁴⁹Yesumi isingi lao dopa leya. Namba imambu koo maralyapyamo karonde daa. Nambame Rakanena kingi ketae nembo karo. Nakamame nambana kingi isa nembelyaminyi. ⁵⁰Dopa pilyaminyiko doŋo namba range ketae ululi karapuli lao suu pyao kara nalyo. Mendeme namba ululi karapili lao suu pyao karamo dokome lao rolara. ⁵¹Kinyi kinyi langilyu, mendeme nambana pii lengenyili pyuo pyuo kararami ramo doko kumungi renge doko kanda nara. ⁵²Juu wambu dupwame baa lamaiyuo, Epapu emba imambu koo maralyapyamo karene doko soo kaelyamano. Aporakame kumuya. Anatunya poropeta akali dupwa kumuyamiko doŋo embame lao dokopa mendeme nambana pii lengenyili pyuo pyuo karara ramo doko kumungi renge doko nakanju see nara lalene kandapi. ⁵³Namwana rakange Aporakame kumuya dokona suu pyao emba mupwa kamame wakasandelyamo. Anatunya akali dupwako kumuyami kande. Emba range apiyakalende suu pyapala

lao karese? leyami. ⁵⁴Yesumi isingi lao dopa leya. Namba range lao ketae pyambwapuli nambana pii doko kulisa ingyua napyali. Nambana Rakange nakamame Anatu lenge dokomeko namba ketae pyambu karamo. ⁵⁵Nakamame baa soo nyepa nange. Nambame baa soo nyingi. Nambame baa soo nyepa nange lapuli doko nakama kyambo lao karengende dokonako mendeke ingyuo karapuli. Dopa pipyamopape nambame baa angi soo nyepala banya pii lengenyili pyuo pyuo lao karengende. ⁵⁶Nakamana rakange Aporakame dokome namba yuu gii eparo doko kandaro lao sepala monanda pyakalyuo pyao kareya. Enakana angi kandapala mona paleyamopa kareya leya. ⁵⁷Dokopa Juu akali dupwame baa dopa lamaiyami. Emba ee kana akalisa pao akalisa kingi paki ene karapa nalene kande doko embame Aporakame kandengese? leyami. ⁵⁸Yesumi nakama lamaiyuo, Kinyi kinyi langilyu, Aporakame ene karapa nayamopa namba kareyono doko erotonge mee karalu karengende. ⁵⁹Dopa leyamo dokopa nakamame baa kaname pyamanale lao lapo niyaminyipa Yesu yalu pipala tembole anda dokona potemo peya.

Yesumi Akali Lenge Kwaengende Pyuo Nyiya

9 ¹Baa katasa paole pyuo karo dokopa akali mende lenge kwaesi manjinyi peeyami doko kandeya. ²Dokopa banya disaepole dupwame baa piso soo, Rapu Pingi, akali doko baa rangeme koo piyasa panda endangi rakangepame mende koo piyambisa baa lenge kwaesi manjo niyamisi? leyami. ³Yesumi isingi lao Akali dokome koo mende pyuope endangi rakangepame koo mende piyambisa baa lenge kwaesi manjo niyaminde daa. Anatumya yulu andake baa keta maro lara ingyua lenge kwaesi manjo niyami. ⁴Yuu yango karamo dakepa namba mapanyi peeyamo dokona yulu doko pyuo kararama ingilyamo. Iminjaramo dokopa mendeme yulu kapa kando pii nange yuu gii doko oo epopyamo. ⁵Namba isa yuu dakena kararano yuu gii dusipa isa wambu dupwana lao yanga paupau lakamyuo kararo leya. ⁶Pii dopa lapala baa yuunya kepakali kyaso retapala awai kukuli lasi rukuraka pyuo pyakerena lao piya. Pipala awai dokome akali dokona lenge doko kisakamiya. ⁷Kisakamipala baa lamaiyuo, Ipwa Pete Silome lenge dokona poeyanyi nembala puu, leya. (Silome doko namwana pii Mapanyi Peenge dopale.) Pao ipwa poeyanyi nembapala kapu kyuo kata kapa kando epeya.ⁱ

⁸Dokopa anda maki palyuo penge wambu dupwame baa wamba bange jinya jinya lao peteyamo kandeyami dupwapeme lao, Akali wamba bange jinya jinya lao pisipya kandapi doko daase? leyami. ⁹Lapome, Doko baalamo leyami. Lapome, Daako dojo mee banya lenge kambu nyilyamo

ⁱ 9:7 Pipala awai dokome akali dokona lenge doko kisakamiya. (9:6)

leyami. Baame, Namba lyakande, leya. ¹⁰Nakamame baa lamaiyuo, Apa pipala lenge rapi? leyami. ¹¹Baame isingi lao, Akali Yesu lenge dokome awai pyakerena lapala nambana lenge doko kisakapala namba ipwa Silome dokona poeyanyi nembapala puu langipyasa namba pao poeyanyi nembapala lenge mee ingyapyamo kandapu leya. ¹²Nakamame baa lamaiyuo, Baa anja karamo? leyami. Baame, Namba soo gisa nalyo, leya.

Parisi Dupwame Yesumi Akali Doko Apa Pyuo Pyuo Nyiya Lao Siyami

¹³Akali wamba lenge kwaeyamo kareya doko Parisi akali dupwa kareyami dokona lanyuo epeyami. ¹⁴Yesumi awai pyakerena lapala akali banya lenge doko yuu gii koro petenge dokopa pyuo elya pyakamiyapya. ¹⁵Parisi dupwame, Apa pisala embena lenge rapi? lao baa dee kamba piso siyami. Dokopa baame nakama lamaiyuo, Baame nambana lenge dokona awai kisakapyamopa ipwa poeyanyi nembapala kapa kando karo, leya. ¹⁶Parisi lapome, Akali dokome koro petenge mawa pii yalo pelyamo dokona Anatumi baa rombo palyiyande daalamo, leyami. Dopa leyaminipya lapome, Akali koo pyuo kareng dokome apa pyuo yulu andake dopale lasaka pyuo kararase? leyami. Dopa lao nakama apiyanda piyami.

¹⁷Dokopa nakamame akali lenge kwaeyamo doko kambako piso siyami. Emba baame lenge elya pyakapyamo doko baasa kando embame apa lao suu pilisi? leyami. Baa Anatunya poropeta akali, leya. ¹⁸Akali doko wamba lenge kwaeyamopa kapa kandeya doko Juu wambu dupwame kiniy dopa pipyalamo lao suu pyaa nayami. Suu pyaa napala akali lenge elya pyakamiya dokona endangi rakangepa dolapo epena lapala ¹⁹piso soo, Nakambana ikinyingi lenge kwaesi manjo niyamba letambinyi doko dakese? Epapu baa apa pipala kapa kandelyase? lao piso siyami. ²⁰Banya endangi rakangepame isingi lamaiyuo, Akali dake nambwana ikinyingi lenge kwaesi manjo niyamba doko soo karambano. ²¹Soo karambwanopape epapu apa pipala baa kandelyamo lao apimi banya lenge elya pyakamiyape lao nambwa see nalyambanoko. Baa piso selapape. Baa andapae dokome rangeme lara, leyambi. ²²Banya endangi rakangepame Juu wambu dupwa pakapala dopa leyambi. Juu wambu dupwame wambo mendakinya palyuo, Mendeme Yesu baa Koraisa, lara ramo doko baa sinakoke anda epa nana lao ralinyi nembarama leyami. ²³Leyamisa endangi rakangepame dokona pakapala lao, Baa andapae karamo dokona range piso selapape leyambi.

²⁴Dokopa dee kamba akali doko epena lapala baa lamaiyuo, Anatunya kingi lao pii rolae laroŋo lao kingi ketae nembo rolo lape. Akali doko yulu koo pingi doko silyamano leyami. ²⁵Dokopa baame lamaiyuo, Baa yulu koo pingipi mee lao see nalyo. Namba mendaki iki soo karo doko, nambana lenge kwaelyamopa kareng dokoko epapu kapa karo leya. ²⁶Nakamame baa

lamaiyuo, Baame emba apa pyakapyase? Apa pisala embena lenge doko elya pyakapyase? leyami. ²⁷Baame nakama isingi dopa lamaiya. Wamba langyuo kaeyalono kandapi doko nakama nambana pii soo nyakayami. Akipamo nakamame dee kamba semana letamisi? Nakama opetae banya disaepole ingyuo karamwali lao suu pilyamisi? leya. ²⁸Dokopa nakamame baa kilya kandalya kandana pyuo lamaiyuo, Emba banya disaepole, namwa Mosesena disaepole ingyuo karamano. ²⁹Anatumi Mosese pii lamaiya doko soo gisilyamano. Soo gisamwanopape akali dae lao karamo doko anja karo epeya lao see nalyamano leyami. ³⁰Akali dokome dopa lao isingi lamaiya. Pii nangende pyaka selamolyamo. Baa dokome dopa lao isingi lamaiya. Pii nangende pyaka selamolyamo. Baa anja karo epeya lao see namiko doŋo baame nambana lenge elya pyakapya. ³¹Anatumi yulu koo pingi wambu dupwana pii sakami nange. Sakami nalyamopape wambu mendeme Anatu ketae pyambuo yako lao karo baa letamuli pyuo pyuo karara ramo doko Anatumi dokonako pii sakamyuo karengé doko silyamano. ³²Isa yuu doko kanda soo ingyamo dokopa piso epo wambu mendeme akali lenge kwaesi manjo niyaminyi mendena lenge elya pyakamiyami leyaminyi see nange. ³³Akali doko Anatumi rombo palyiyamopa epa nayali doko baame mende kapa pii napyali leya. ³⁴Nakamame baa kando lao, Koo andake pipala emba manjo niyami doko embame namwa mana langirisi? leyami. Lapala baa neta nembeyami.

Imambunya Yulu Kapa Kandenge Lao Pii Lapo

³⁵Baa ramanyi nembeyaminyi doko Yesumi sepala koto kando nyepala baa lamaiyuo, Embame Ikinyingi Akali kapa ingingi lao suu pyao karepe? leya. ³⁶Dokopa baa isingi lao, Rapu Pingi baa apisi lao rolo langyarene dokopa nambame baa kapa ingingi lao suu pyao kararo, leya. ³⁷Yesumi baa lamaiyuo, Embame baa kando karapinyi emba pii langyuo karamo doko leya. ³⁸Baame isingi lao, Kamongo, nambame kapa ingingi lao suu pyao karo, lapala baame Yesu mupwa lao pongwa naró peteya.

³⁹Dokopa Yesumi dopa leya. Isa yuu dakena kote lao rolala epeyo dokome wambu lenge raa nao kareyami dupwame kando soo kararaminyipa lenge rao kareyami dupwa lenge kwaeramo parami leya. ⁴⁰Parisi lapo baa kareyamo dokona repeta kareyami dusipame baa lamaiyuo, Namwa opetae lenge koonde karamase? leyami. ⁴¹Yesumi nakama lamaiyuo, Nakama lenge kwao karo kata rolae kanda namili doko pii mende pali napyali. Nakamame range kando karamano letaminyi dokona yulu rolae kando kaeyo yalo karamisa pilyamo.

Sipisipi Dokona Kongwalu Pii Mende

10 ¹Yesumi dopa leya. Kinyi kinyi langilyu, mendalimi mena sipisipinya kakopasa kambu rolae dokona epa napala kata wakale

mendena yalala epara ramo doko waa nao kendepo nengendeme pira
 pira. ²Dopa piramopape mendali kata kolando penge dokona epara ramo
 doko sipisipinya rapu pinginde eparasa pira. ³Baa epelyamosa kambu
 rapu pingi akali dokome kambu lumbwakamaingi. Sipisipi dupwame
 banya pii doko sakamilyaminyipa baame banya rangena sipisipi kingi
 lao gee lao penge. ⁴Banya sipisipi kando gee lapala wambo pelyamopa
 banya sipisipi dupwa banya pii sepala baa pelyamuli pyuo pao karenge.
⁵Nakama akali kanda nange dupwana pii see nange dokome akali kanda
 nange mende paramuli pyuo paa napala baa yaki nyepala ralo parami
 leya.

⁶Yesumi dopa lao makande pyuo lamaiyamopa renge angi leyamo
 doko soo gisa nayami.^j

Yesu Baa Sipisipinya Mondo Pingi Akali Ingyuo Karamo

⁷Soo gisa nayami dokona Yesumi dee lamaiyuo, Kinyi kinyi langilyu,
 namba sipisipinya kakota lumbungi kambu dowo dopale karo. ⁸Namba
 epapa nayonopa wambo epeyami dupwame waa nao kendepo nao dopale
 epeyamisa piya. Dopa piyaminyipa sipisipi dupwame nakamana pii
 doko sakami nayami. ⁹Namba kambu dowo doko. Mendeme namba keta
 epara ramo dokopa lete wai pyao papala baa potemo konando pyuo karo
 dokopa pama nenge nenge doko kando nao karara. ¹⁰Waa nyingi akali
 dokome mee waa nyuo kokwa soo nembala epenge. Epelyaminyipape
 nambame nakama keta kyakana renge doko maiyuokondali pyaa epeyo.

¹¹Namba sipisipi dupwana rapu pingi angingyuo karo. Rapu pingi angi
 keyange doko sipisipi dupwana lao kumuo maira, kumakamingi. ¹²Akali
 sipisipi range daa mee kanana rae maiyuo rapu pyuo karenge dokome
 yana suwa kararope andake nalana pingi doko epelyamo kandapala
 sipisipi dupwa yaki nyepala ralo penge. Dokopa yana suwa kararope
 andake dokome sipisipi dupwa nao rokwapala bolombalo lanyi nembo
 pyuo karenge. ¹³Akali doko baa kana iki suu pyao pyuo karo sipisipi
 dupwa suu pyaa nange dokome ralo penge. ¹⁴⁻¹⁵Namba sipisipi angi
 keyange rapu pyuo karenge. Rakange dokome namba soo gisilyamopa
 nambame Rakange doko soo gisingi doko suu pyao nambame nambana
 range dupwa soo gisilyunupa nambana range dupwame namba soo
 gisingi. Dopa pilyamo dokopa nambame nambana sipisipi dupwa reke
 lao kapa kumakamairu ingilyamo. ¹⁶Nambana sipisipi wakale lapo
 karaminyi dupwa kakopasa dakena kara nalyaminyi. Nakama dupwa
 opetae lanyuo eparo ingilyamo. Dokopa nambana pii sakarami. Dokopa
 rapu pingi mendakindeme rapu pyuo kararamopa rara mendaki ingyuo
 role pyao kararami.

^j 10:6 Banya pii sepala baa pelyamuli pyuo pao karenge. (10:11)

¹⁷Namba kapa kumakamairu dokona nambana Rakange dokome namba mona reto karamo. Letena renge dee kamba nyero lapala kapa kumakamairu. ¹⁸Namba daa laronopa mendeme namba pyao kumakaraminde daa. Namba range maso kumuo mairu renge dokope dee kamba lete paro renge dokope namba range keta palamo. Nambana Rakangeme dopako piri langiyamuli pyuo piro leya.

¹⁹Dopa leyamo dokopa Juu wambu dupwame lamasa lao paka lakyuo pii wakale wakale lao lao kareyami. ²⁰Lapome, Baa imambu koo mende palipyasa kopyali minyapala lao karamo. Akipamo banya pii sakamairamase? leyami. ²¹Lapome, Akali imambu koo palelyasa lao kareng banya pii dopale ingy nalyamo. Imambu koo dokome wambu lenge kwaenge doko kapa elya pyakamaingisi? leyami.

Juu Dupwame Yesu Mata Maiyami

²²Anatu dokona suu pyao Jerusaleme dokona tembole anda elya pingi nenge nenge mange doko pyaka siya. Doko kupwa pingi kana dokopa ²³Yesumi tembole anda kambu kolandowame kingi Solomonena lenge dokona kata peya. ²⁴Dokopa Juu wambu dupwa baa kareyamo dokona karo awali lapala, Yuu akipare embame apa letepe lao walu lao papa lao kararamopa angi polo langya narese? Emba Koraisa ramo doko angi langipi, leyami. ²⁵Yesumi nakama isingi dopa lamaiya. Namba langipu doko kinyi lalyane lao suu pyaa nalyaminyi. Nambana Rakanena kingi lao yulu pyuo kareng yulu dupwa kandapala namba dopa pyuondelyamo lao soo gisarami ingyapya. ²⁶Nakama nambana sipisipi angi ingyuo kara nalyaminyi dokome kinyi lalyane lao suu pyaa nalyaminyi. ²⁷Nambana sipisipi dupwame nambana pii silyaminyipa nambame nakama kandenge dokome nakama namba moko minyuo epenge. ²⁸Dokopa nambame nakama letena renge kulisa palu palenge doko mailyunusa nakama kumalu kumuo kuma naraminyipa nambame minyaro kararonopa mendeme kingi raka lao nyii narami ingilyamo. ²⁹Nambana Rakaneme nakama namba jiyamo doko wakasa ingyuo karamo dokona mendeme banya kingi raka lao nyii narami ingilyamo. ³⁰Namba Rakanepa mendaki ingyuo karambano leya.

³¹Leyamopa Juu wambu dupwame baa pyalana lao kana dee kamba nyiyami. ³²Dokopa Yesumi pii mende dopa lamaiya. Rakaneme renge kuipyamosa yulu keyange malu lasaka pipa pyuo karapu dupwana mende anjukunya lao namba pyalana pilyamipi? leya. ³³Juu wambu dupwame baa isingi lamaiyuo, Yulu keyange dupwana emba kaname pyalana pilyamande daa. Embame Anatumya lenge kambu dokona kokwa soo lao karo emba mee akali kinyi kinyi dokome, Namba Anatu dopakale lao karene dokona emba kaname pyalana pilyamano leyami. ³⁴⁻³⁵Anatumi wambu banya pii soo kareyami dupwa Anatu ingyuo karaminyinji leyamo

pii doko nakamana Lowa buku dokona pyasi palamo. Baepolena pii mende isa paa nange kande leya Yesumi. ³⁶Doko suu pyao Rakaneme rombo palyapala isa yuu dakena namba mapanyi peeyamo dokome namba Anatonya Ikinyingi lapunupa nakamana akipamo Anatonya lenge kambu dokona kokwa soo lapinyisa pipya letamisi? ³⁷Nambana Rakanena yulu dupwa pyuo kara naro ramo doko kinyi lalyane lao suu pyaa nalapape. ³⁸Dee yulu dupwa angi pyuo kararo ramo doko namba kando angilamo lao suu pyaa nayami kande doko yulu pyuo karo dupwa kando kinyilamo lao suu pyalapape. Dokome Rakane namba keta palipyamopa namba Rakanena dokona karene lao soo gisarami leya.

³⁹Dokopa dee kamba baa puu mainya lareyami dokopa baa kolala peya.

⁴⁰Papala dee ipwa Jotane yalo pao Jone wamba kanda soo wambu bapitisimo nyakamyuo kareya dokona pao kareya. ⁴¹Dokopa wambu malu baa kareyamo dokona epapala, Jone yulu mende andake pyuo lasaka pii nayamopape baa akali dakesa pii leyamo dupwa peparae kinyi ingyuo pelyamo, leyami. ⁴²Dokopa yuu dokona wambu malumi baa kapa ingingi lao suu pyapala mona maiyami.

Yesumi Lasarasa Lopo Lete Nyiya

11 ¹Akali mende Lasarasa lenge yuu Betani range doko anga piya. Yuu Betani doko Maria kakingi Mata dokopana yuu anda kuki lama malu palyuo karene. ²(Maria dokome Kamongo dokona mamba rendamu pingi mende kisakamipala banya kyawasi dokome kimbu pyao nembakamiya enda dokona pemalenge Lasarasa lenge doko anga piya.) ³Anga piyamo dokona wana kakingipa dolapome wai nembo, Kamongo embame mona retenge doko anga pyapyamo silyamo, lao lamaiyambi. ⁴Dokopa lamaiyambinyi pii doko sepala Yesumi dopa leya. Anga dokome kumarande daa. Anga doko mee ingyarasa wambumi Anatu lakandarami ingilyamo. Lakandarami dokopa banya Ikinyingi doko opetae ketae pyambusi kararamosa pira.

⁵Yesumi Matamoo banya kakingipi dee Lasarasamoo dusipa mona reteya. ⁶Dopa pyuo kareyamopape Lasarasa anga andake pilyamo lao sepala yuu dokona yuu lama mee kareya. ⁷Enakana disaepole dupwa lamaiyuo, Yuu Jutia dokona dee kamba paramano leya. ⁸Disaepole dupwame baa lamaiyuo, Rapu Pingi, Juu wambu dupwame emba ene alebole kaname pyao kumakalana piyami kande dokona dee kamba yuu dokona panya letese? leyami. ⁹Yesumi isingi lamaiyuo, Yuu yangenge dokopa keloke gii akalisa ipisu lama nyero pali nangese? Yuu yango karelyamo dokopa mendali kata para ramo doko yuu dakena yango karene dokona lukumo see nange. ¹⁰Dopa piramopape mendali kukwamana kata para ramo doko baa keta yango kara nalyamo dokona

lukumo singi leya. ¹¹Dopa lapala nakama pii mende lamaiya. Namwana puu minyingi Lasarasa doko luu palyuo silyamo doko baa lenge rena lao pyaletala pelyo leya. ¹²Disaepole dupwame baa lamaiyuo, Kamongo baa luu palira ramo doko mee ingyara leyami. ¹³Yesumi Lasarasa kumuya dokona kongwalu palyuo leyamopape nakamame baa luu palamo lalyamo lao suu pyapala leyami. ¹⁴Dokopa Yesumi nakama rolo lamaiyuo, Lasarasa baa kumasi silyamo. ¹⁵Kumasi silyamo doŋo yuu mange dusipa namba baapa role pyao kara napusa nakama yulu andake mende kandarami dokona rae mailyu. Kandapala namba kapa ingingi lao suu pyarami ingilyamo. Baa silyamo dokona mwua, leya. ¹⁶Tomasa kingi mende Reme Paka lenge dokome disaepole yango dupwa lamaiyuo, Namwa opetae baa pale pale kumarama mwua leya.

Yesu Keta Letena Renge Palamo

¹⁷Yesu epapala dokopa Lasarasa yuu kisima malu anda dokona sipyalayo lao siya. ¹⁸Yuu Betani doko yuu Jerusaleme kata makande pingi kilomita rema ingyuo repeta siya. ¹⁹Dokopa Juu wambu malumi Mata Mariapa peteyambi dokona pemalenge kumuyamo dokona mona minyarambu pisa epeyami.

²⁰Dokopa Matame Yesu epeyamo doko sepala Maria anda mee peteyamopa baa katasa yako lao nyela peya. ²¹Matame Yesu lamaiyuo, Kamongo, emba dae kareeli doko nambana pemalenge doko kuma napyali. ²²Doko epapu dakepa opetaeko embame Anatu mende pyakana lakare ramo doko Anatumu kapa pyakara doko silyu leya. ²³Yesumi baa lamaiyuo, Embena pemalenge dee sipurao epara leya. ²⁴Matame baa lamaiyuo, Rengya yuu lumwa piramo dokopa wambu sipurao eparami mange dokopa sipurao epara doko silyu, leya. ²⁵Yesumi baa dopa lamaiya. Sipurao epengepe lete karengape renge dolapona namba renge kuiyuo karo. Akali mendeme namba kapa ingingi lao suu pyao mona jera ramo doko baa kumapalape mende lete karara. ²⁶Doko mendeme kumapa nao karo namba kapa ingingi lao suu pyao mona jera ramo doko baa kumalu kumuo kuma nara. Emba doko kinyi lalyane lao suu pyapepepe? leya. ²⁷Kinyi Kamongo, Koraisa Anatumu Ikinyingi isa yuu dakena epara ingiyamo doko embalyamo lao suu pyapelyo leya.

Yesu Ee Leya

²⁸Pii dopa lapala pao kakingi Maria elya kalo kee lao dopa lamaiya. Mana Lenge dae epo karapala emba ipu letamo leya. ²⁹Dokopa pii doko sepala Maria waiya lao sipurapala Yesu kareyamo dokona peya. ³⁰Yesu anda lapo malu palyuo kareya dokona epapa napala Matame baa kando nyiya katasa dokona mee kareya. ³¹Juu wambu Maria mona minyarambu andakare role pyao peteyami dupwame Maria baa sipurapala kamanda

peyamosa kandapala baa malu anda dokona ee lala pwuamo lao sepala baa peyamuli pyuo peyami.

³²Dokopa Maria Yesu kareyamo dokona epapala baa lamaiyuo, Kamongo, emba dae kareeli doko nambana pemalenge kumapa nayali leya. ³³Maria baa ee lao mee wambu role pyao epeyami dupwa eeko leyamisa Yesumi kaepala banya monarena lulaka peyasa banya monarena pulunongo piyamo kareya. ³⁴Dokopa, Baa anja malu piyami? leya. Nakamame baa lamaiyuo, Kamongo, kandalase ipu, leyami. ³⁵Yesu ee leya. ³⁶Dokona Juu wambu dupwame, Baame baa apa pyuo mona reto karengape lao kandalapa, leyami. ³⁷Dopa leyaminyipape lapome, Akali lenge kwaenge elya pyuo nyiya dokomeko akali dake kumapa nana kapa lara ingya nayase? leyami.^k

Lasarasa Pyuo Nyiya

³⁸Dopa leyami dokopa Yesu kamba lulaka koo peyamopa malu anda peya. Malu pingi kananda dokona kana mendeme upi laro kareya. ³⁹Yesumi, Kana nyuo kakondalapape, leya. Mata akali kumuyamo dokona pemalenge dokome baa lamaiyuo, Kamongo yuu kisima baa kumuo palipya dokome rumbuyo ai pyao pilyamo leya. ⁴⁰Yesumi baa lamaiyuo, Emba kapa ingingi lao suu pyare ramo dokopa Anatanya yanga paupau lenge doko kandare lao langi napusi? leya. ⁴¹Dopa leyasa kana doko nyuo kakondeyami. Dokopa Yesumi kandalyuo kandapala dopa leya. Rakane embame nambana pii soo karalenelyamo lao ange leto. ⁴²Yuu peparae embame nambana pii soo karengape doko namba silyu. Sipunupape wambu dae karaminyi dupwa embame namba mapanyi peelyamo lao sinyale lapala atenja dake lalono, leya. ⁴³Dopa lapala pii porakaiyuo lao, Lasarasa, neta ipu leya. ⁴⁴Dokopa akali kumasi doko neta epeya. Banya kingi kimbupi komaumi yaki pyuo dee lenge kambu komau mendeme yaki pyuo pisala sereyami doko palepeta epeya. Yesumi nakama lamaiyuo, Baa anda pena lao komau doko polakamipape leya.

Yesu Pyamana Lao Wato Leyami (*Mat 26:1-5; Mak 14:1-2; Lu 22:1-2*)

⁴⁵Dopa piyamo dokopa Juu wambu malu Maria role pyapeta epeyami dupwame baa piyamo doko kandapala baa kapa ingingi lao suu piyami. ⁴⁶Suu piyaminyipape lapome Parisi dupwa kareyami dokona pao Yesu dopa pipyaŋa lao lamaiyami. ⁴⁷Dokopa purisi akali mupwa dupwape Parisi dupwapeme wato andake lenge akali dupwa sukusa sukusa pyuo epena lapala, Namwa apa pirama? Akali dokome yulu andake malu lasaka pyuo karamo. ⁴⁸Baa pilyamo doko pyuo karalu karena larama

^k 11:37 Lasarasa, neta ipu leya. (11:43)

ramo doko wambu dupwa peparaeme baako suu pyao kararami dokopa Orome akali dupwame epo namwana anda poo pyasi doko namwana rara dupwape kokwa sinyi nembarami leyami. ⁴⁹Dopa leyaminipana nakama peteyami dokona mende Kayapasa lenge baa ee kana dokona purisi mupwa wakasa ingyuo kareya dokome nakama dopa lamaiya. Nakamame mendekepe see nalyaminyi. ⁵⁰Namwa rara dupwa lemboke nyii nana laramanopa akali mendaki mende wambu dupwana lao kumara dokopa namwa keta kapa ingyuo palira doko soo gisa nalyaminyi leya. ⁵¹(Baa range maso pii dake laa naya. Baa ee kana dokona purisi muwpa wakasa ingyuo karapala Yesu Juu rara dupwana lao kumara lao Anatumi pyongo piyamopa polo leya. ⁵²Juu wambu dupwanako iki daa Anatunya wane wanake raeyo petaminyi dupwa nyuo mendakinya ingyuo petena lao kumara renge dokona leya.) ⁵³Baa dopa pyuo polo lareyamo gii dokopa kanda soo nakama kaeya nao wato lao apa pyuo pyao kumakarama lao kareyami. ⁵⁴Dokopa Juu wambu kareyami panda dokona Yesu dee panembena papyuo kareyande daa. Kara napala yuu doko yaki nyepala yuu nempa nempa yuu muiyane repeta siyamo doko anda malu palyuo kareyamo yuu Eporaime lenge dokona peyamopa disaepole dupwa role pyao kareyami.

⁵⁵Dokopa Juu wambunya Pasopa nenge nenge gii doko pyaka selana piyasa wambu malu yuu nempa nempa karo Jerusaleme dokona lalyuo Pasopa nenge napa nayaminyi dokopa range poo pyalana lao peyami. ⁵⁶Dupwame Yesu anja karamo lao koto karo tembole anda dokona karapala nakama lao, Apa lao suu pilipi? Baa nenge nala eparape mee? lao kareyami. ⁵⁷Purisi akali mupwa dupwape Parisi dupwapeme lamaiyuo, Mendalimi baa mendasa karara ramo kandeyami kande dokopa namwa langya ipupwape lao puu maiyalana leyami.

Maria Baame Yesunya Kimbu Mamba Kisakamiya

(Mat 26:6-13; Mak 14:3-9)

12 ¹Yuu gii pakinyamange epo paparamopa Pasopa nenge narami ingiyamopa Yesu baame yuu Betani Lasarasa lopo niyamo dokona peya. ²Yesunya nenge rapa rapa pyakamiyaminyi dokopa Matame mokwa soo kareyamo Lasarasa taepo repeta Yesupa role pyao peteya. ³Dokopa Mariame mamba luli lenge kana malumi ropo pingi dokona maki mendaki nyepala Yesunya kimbu dokona kulimbwakampala banya kyawasi dokome kimbu dolapo pyao nembakamiya. Dokopa anda doko mambame kyaa pyuo simbuya. ⁴Dopa piyamopape banya disaepole kareyami dokona mende Jutasa Isakeriote lenge baa mata kando lara ingiyamo dokome dopa leya. ⁵Akipamo mamba dakeme ropo pyao kana malu (300) nyepala pendewa wambu dupwa mokwa soo mai napyase? leya. ⁶Baame pendewa wambu dupwa suu pyao leyande daa. Baa mone

singi bokote minyuo kareyamo dokome bokote dokona kana retapa pingi dupwa baa waa nyipulinya suu pyao leya. ⁷Yesumi dopa leya. Enda baa pyuo petena, kando laa kaeyalapape. Namba malu pirami dokona lao silyamo dupwa mee retaro pisakana. ⁸Pendewa wambu dupwa nakama pipya yuu peparae role pyapeta kareng. Nambamoo nakama pipya rakyame role pyapeta kararamande daa leya.

Lasarasa Operae Pyamana Leyami

⁹Juu wambu ama malu dupwame baa karamo leyaminyi doko sepala kandala epeyami. Baako yeelyo kandala epeyaminde daa, Lasarasa kumuo paleyamo minyalyuo nyiya doko opetae kandala epeyami. ¹⁰Dokona purisi akali mupwa dupwame Lasarasa opetae pyao kumakarama lao wato leyami. ¹¹Baa lete kareyamo dokome Juu wambu malu nakama yaki nyepala Yesu kapa ingingi lao suu pyao kareyamisa dokona imbwuapala dopa pyuo wato leyami,

Yesu Jerusaleme Peyamo Dokopa Wambumi Baa Lakandeyami (*Mat 21:4-9; Mak 11:1-11; Lu 19:28-40*)

¹²Dokona yangama dokopa wambu ama malu Pasopa nenge nenge dokona nala epeyami dupwame Yesu Jerusaleme epelyamo lao sepala, ¹³isa bona dupwana yokonge nyepala baa epeyamo dokona kando nyela pao pii ketae palyuo dopa leyami. Anatu lakandamana. Kamongona kingi lao epelyamo Isaraelena Kiñi doko keta renge keyange epakaminya leyami. ¹⁴Dokopa Yesu donge kumambonande kando nyepala dokona peteya. Doko suu pyao pii pyasi mende palamo.

¹⁵Doko yuu Sayone wanenge doko emba paka napipi.

Embena Kiñi doko donge kumambonandena piso epelyamo kande. ¹⁶Pii doko banya disaepole dupwame renge soo gisapa nayami. Soo gisapa nayaminyipape enakana Yesu yake panda peyamo dokopa pii doko Baepolena pyasi paleyamuli pyuo piyamilyamo lao soo manjo nyiyami.

¹⁷Lasarasa malu anda dokona kumuo paleyamo neta enena lao minyalyuo nyiya dokopa wambu malu role pyao kareyami dupwame banya yulu doko lao raeyami. ¹⁸Yulu andake doko pyuo lasaka piya leyaminyi sepala dokona wambu malu baa epeyamo doko kandapala dopa pyuo lakandeyami. ¹⁹Dokopa Parisi dupwame nakama lao lao, Mende piri ingya nalyamo kandelese? Wambu peparaeme baa rungi rungi pyao pelyaminyi leyami.

Giriki Wambu Lapo Yesu Koteyami

²⁰Wambu Pasopa nenge nenge yuu gii dokopa Anatunya kingi Jerusaleme lala lalyuo peyami dokona role pyao Giriki wambu lapo peyamioko. ²¹Dupwame Pilipa yuu Galili dokona yuu Betesaita range

doko kareyamo dokona pao lamaiyuo, Yangone namwa Yesu kandalana lao suu pilyamano leyami. ²²Dokopa Pilipa baame pao Enduru lamaiyamopa Enduru Pilipapa pakapala pao Yesu lamaiyambi. ²³Dokopa Yesumi pii mende nakama dopa lamaiya. Yuu gii Ikinyingi Akali yanga paupau lara doko pyaka silyamo. ²⁴Kinyi kinyi langilyu, witi jingi mende yuunya pao kuma nara ramo doko baa etoreng sulu sera. Dopa piramopape endangi yuunya palyuo kene pyapala rumbingi dokopa jingi malu lyingi. ²⁵Mendeme range karamo dokona mona nyepala kyawa minyuo karalana suu pyara ramo doko letena renge dokona pyakuirasa pira. Mendeme rangena yulu dokona mona mai napala kame soo kaera ramo doko baa letena renge nyepala karalu karara ingilyamo. ²⁶Mendali nambana yulu pyuo karara doko namba paronuli pyuo epara ingilyamo. Dokome namba karare dokona nambana yulu pingi akali dokopa role pyao kararamba. Mendali nambana yulu pyuo kararamo doko Rakaneme baa ketae pyambwaramo karara.

Yesu Kumara Doko Wambo Leya

²⁷Eapu namba monarena pulunongo pyapyamopa karo. Dokona apa larose? Rakane, yuu gii dakepa yulu palamo dokona namba keta pali nanale lao namba nyisape, larose? Daa, gii dakepana yulu palamo dokona palira lao epeyo. ²⁸Rakane, embena kingi ketae pyambu karape leya. Dokopa yake panda dokona piso pii mende lao, Wamba dokopa nambana kingi doko ketae pyambu kareyo. Deeko lao ketae pyambu kararo leya.

²⁹Wambu malu doo kareyami dupwame pii doko sepala, Yuu gala lalyamo leyami. Wambu lapome, Ajala mendeme baa lamailyamo, leyami. ³⁰Yesumi pii mende lao dopa leya. Pii doko namba reke lao lao epande daa. Nakamana lao lao epamo leya. ³¹Eapu gii dakepa isa wambu dupwa lao yapalya yapana pira ingilyamo. Eapu isa wambu dupwana kamongo doko nyuo ralinyi nembara. ³²Namba nyuo ketae minyalyuo palyarami gii dokopa wambu peparae namba palirunu dokona sukusa sukusa pira leya. ³³(Baa apa pyuo kumuo yaso nao paro lao pii doko wambo leya.) ³⁴Dopa leyamo dokopa wambu malu kareyami dupwame baa dopa lamaiyami. Mawa Pii dokona Koraisa baa karalu karara lao palelyamopa namwa singi. Dokona apa pyuo Ikinyingi Akali doko minyalyarami ingilyamo lalese? Ikinyingi Akali doko baa apisi? leyami. ³⁵Yesumi nakama dopa lamaiya. Yuu gii mee lama nakama pipya yanga paupau lao karalopyamo. Iminjasara lapala yango karamo dokopa kata nyuo puu pao parami. Mendali iminjilyamo dokopa kata penge doko anja pelyo lao see nao penge. ³⁶Yanga paupau lao kareng doko baa nakama sukusa karamo gii dusipana baa kinyi lao suu pyao karalapape. Dokome nakama yanga paupau lengena wane wanake ingyuo parami leya.

Juu Wambu Dupwame Yesu Kapa Ingingi Lao Suu Pyaa Nayami

Dopa lapala kanjakala pao nakama baa kanda nana lao yalu pyuo kareya. ³⁷Nakama kando kareyaminyipa baame yulu andake malu lasaka pyuo kareyamopape nakamame baa kapa ingingi lao suu pyao kara nayami. ³⁸Dopa piyaminyi doko Anatumya poropeta akali Aisaya lenge dokome pii mende leyamo dokona suu pyao piyamisa piya. Pii doko dapa lao palamo.

Kamongo, namwa lalamano doko api mendeme kinyilyamo lao suu pyalamisi?

Kamongona porainya renge doko apimoo keta paneyamo kandeyamisi? lao palamo.

³⁹Renge dokona lao baa kapa ingingi lao suu pyaa nayami. Dokona lao Aisayame pii mende dopa leya.

⁴⁰Anatumi nakamana lenge koo inginyi pyambuo, mona kana pokwanyi pyambuo piyalyamo.

Nakamana lengeme kando monarena soo giso pipala namba kararo dokona

kapu kyepala pyuo elya pyuo nyakape lasarami lapala dopa piyalyamo,

leya. ⁴¹Aisaya baame Yesu yanga paupau laramo doko wambo kandapala baasa lao leyalyamo.

⁴²Dopa leyamopape Juu rapu pingi akali mupwa lapo dupwapeme baa kapa ingilyamo lao suu piyami. Lao suu pyapala sinakoke sukusa karamano doko ramanyi neta nembaraminyi lao nakamame Parisi akali dupwa kando pakapala dopa lao suu piyamano lao polo laa nayami.

⁴³Anatumi nakama lakandara dokona poraiyuo mona nyuo kara napala isa akali dupwame nakama lakandarami dokona suu pyao kareyami.

Yesunya Pii Doko Wambu Kando Lara Ingilyamo

⁴⁴Dokopa Yesumi pii ketae palyuo lao dopa leya. Mendalimi namba kapa ingingi lao suu pyara dokome nambako iki suu pyaa narasa pira. Namba mapanyi peeyamo doko suu pyao kararasa pira. ⁴⁵Doko suu pyao mendeme namba kandara dokome namba mapanyi peeyamo doo kandarasa pira. ⁴⁶Mendalimi namba kapa ingingi lao suu pyao karara doko iminjingi dokona pisu piso pisa nana lapala namba yanga paupau lao isa yuu dakena epeyo. ⁴⁷Wambu mendeme nambana pii dupwa sepala minya nao karara ramo dokopa nambame baa kando kote laa naro. Dokona ingyuo isa wambu dupwa kando yapalya yapana pyuo lala epeyonde daa. Nambame isa wambu dupwa nyiso pyuo nyela epeyo.

⁴⁸Mendalimi namba kando waso waso pii napala soo nembo pyuo karara ramo doko yuu gii lumwa pira dokopa pii lapunu dokomeko baa kando

lara ingilyamo. ⁴⁹Dokona lao nambame sisu lao lapunde daa. Rakane namba mapanyi peeyamo dokomeko namba pii laro dupwa langipyamosa pilyamo. ⁵⁰Dokona suu pyao baame lalu lao leyamo pii doko kyakana renge kulisa doko sulu singi doko soo gisilyu. Dokona pii lao karo doko Rakaneme dopa lape lao lapyamuli pyuo leto leya.

Yesumi Banya Disaepole Dupwana Kimbu Wate Pyakamiya

13 ¹Pasopa nenge repeta pyaka siyamo dokopa Yesumi isa yuu dakena yaki nyepala rakange keta paponolyamo lao soo manjo nyiya. Baame banya wamba mona reto kareya dopako pyuo mona reto karo kumuya.

²Alemanji nenge napa nayaminyi Satane dokome Jutasa Isakeriote Saimonena ikinyingi dokona monarena kunji pyao Yesu mata kando lena leya. ³Dokopa Yesu Rakaneme yulu peparae kingi rakana palyakayamopa karo epapala dee Anatu karamo dokonako parolyamo lao soo gisiya. ⁴Soo gisapala nenge nao peteyaminyi dokona roya karapala banya komau sakisi doko koko retapala saole mende nyepala wapuya. ⁵Wapupala disi mendena ipwa kulimbuo retapala disaepole dupwana kimbu dupwa wate pipapu saole wapuyamo dokome pyao nembapa pyakamiya. ⁶Dopa pyuo karo Saimone Pita peteyamo dokona epeya. Dokopa Pitame baa lamaiyuo, Kamongo, embame nambana kimbu wate pyakarese? leya. ⁷Yesumi baa isingi lamaiyuo, Pilyunu doko dakepa soo gisa nalene. Rengya sere leya. ⁸Pitame baa lamaiyuo, Embame nambana kimbu wate pyaka nalu nao nare leya. Yesumi baa isingi lamaiyuo, Nambame emba wate pyaka naro ramo doko emba nambana mana nyii nare leya. ⁹Saimone Pita baame baa dopa lamaiya. Kamongo, nambana kimbu yeelyo daa. Nambana kingipi ayembape opetaeko pyakape leya. ¹⁰Yesumi baa lamaiyuo, Mendali wate pyuokondali piramo doko dee wate pira ingya nara. Kimbu iki dee wate pira ingyara. Dokopa banya yanenge peparae elyape sera. Sipyamopa nakama elyape karaminyipa mendaki iki karo pisipyamopa karamo leya. ¹¹(Akali dokome mata kando lara lao soo gisapala lao nakama peparae elyape daa leya.)¹

¹²Nakamana kimbu wate pyakamipala banya komau dusipa nyepala wambo peteyamo dokona pisipala nakama lamaiyuo, Namba mende pyakalono doko nakama soo gisilyamisi? ¹³Nakamame namba kando, Namwana Mana Lenge, Kamongo lenge kandale. Namba dopale ingyuo karo dokona kapa rolae letaminyi. ¹⁴Nakamana Kamongo, Mana Lenge dokome nakamana kimbu wate pyakapu ramo dokona nakama rangeme mendeme mendena kimbu wate pyakamirami ingilyamo. ¹⁵Nakama pipunyili pyuo pyuo kararami lao yulu doko lasaka pyano. ¹⁶Kinyi kinyi

¹ 13:11 Kamongo, embame nambana kimbu wate pyakarese? leya. (13:6)

langilyu, kendemande akali dokome wakasa ingyapala banya kamongo doko kando ulu pili londele lao kara nange. Dee mendeme akali mende wai pii minyuo pena laramo doko suu pyao minyuo paramo akali doko mapanyi peeyamo dokona kando ulu pili londele lao kara nangeko. ¹⁷Pii doko soo gisapala kararami ramo doko nakama keyange keta palirami.

¹⁸Nakama peparaesa kando laa nalyo. Nambame akali rombo palyiyu dupwa soo kaeyo karo. Pii pyasi palamo mende, Nambana nenge nao pisipyamo akali doko kapu kyepala kimbu yukaname namba kalyalana pira leyamo doko leyamuli pyuo pira. ¹⁹Angi pyaka seramo dokopa namba baalyamo lao soo nyerami lapala ene pyaka sepa nalyamo dakepa dopa pirana lao langilyu. ²⁰Kinyi kinyi langilyu, mendeme namba pena laro doko yako lao nyeramo dokome namba yako lao nyerasa pira. Mendeme namba yako lao nyeramo dokome namba mapanyi peeyamo doko yako lao nyerasa pira, leya.^m

Mendeme Mata Kando Lara Lao Yesumi Wambo Leya

(Mat 26:20-25; Mak 14:17-21; Lu 22:21-23)

²¹Yesu pii dopa lapala baa monarena randa piyamopa karapala dopa lao polo leya. Kinyi kinyi langilyu, nakama petaminyi dokona mendeme namba mata kando lara, leya. ²²Disaepole dupwame mendeme mendali kanda kanda pipala apisa letamo lao saka nayami. ²³Banya disaepole dokona mende Yesu mona reteya doko Yesunya paralisa peteya. ²⁴Akali doko Saimone Pitame gyaakai pipala, Baa apisa letase lao piso sepe leya. ²⁵Dokopa akali doko Yesunya kyangali dokona lalyuo sili lapala dopa pyuo piso, Kamongo, emba lalene doko apisi? leya. ²⁶Yesumi isingi lao, Borete kunjasi dake poeyapala mairunu akali doko leya. Lapala borete doko poeyapala Jutasa Saimone Isakeriotena ikinyingi doko maiya. ²⁷Borete doko maiyapeyamopa Satane Jutasa baa keta epo maralyiya. Yesumi baa lamaiyuo, Emba mende piri ingilyamo doko waiya lao pipi leya. ²⁸Dopa pyuo leyamopa nenge nao peteyaminyi dupwame baa pii lamaiyamo dokona renge angi doko soo gisa nayami. ²⁹Lapome Jutasa kana mone bokote minyuo kareya dokome Yesumi Pasopa nenge narama ingilyamo dokona ropo pinyale lalyamo panda pendewa wambu dupwa kana lapo mainyale lalyamo lao suu piyami. ³⁰Jutasame borete nyepala aopa kamanda peya doko kukwama.

Yesunya Mawa Pii Enenge

³¹Baa kamanda papeyamopa Yesu dopa leya. Epapu Ikinyingi Akalinya kingi ketae pyambusi silyamo. Dee baa keta Anatunya kingi doko ketae

^m 13:20 Disaepole dupwame mendeme mendali kanda kanda pipala apisa letamo lao saka nayami. (13:22)

peyamoko. ³²Dee dopako pyuo Ikinyingi Akali doko enakana Anatu baa keta kingi ketae pyambusi karara. Doko aopa pira ingilyamo.

³³Nambana wane dupwa namba yuu gii malu ingyuowale nakama pipya role pyapeta kara narama. Nakamame namba kotarami. Dokona suu pyao Juu wambu lamaipu dokoko epapu nakama langilyu, Namba panya karo dokona kapa epa narami. ³⁴Mawa pii enenge mende jilyu. Nakama yango mendali mona reto karalapape. Nambame nakama mona reto karengge dopako pyuo nakama yango mendali mona reto karalapape. ³⁵Nakama dopa pyuo yango mendali mona reto kararami ramo doko wambu peparaeme nakama nambana disaepolelamo lao kando serami leya.

Yesumi Pitame Kando Mata Joo Karare Lao Wambo Lamaiya
(*Mat 26:31-35; Mak 14:27-31; Lu 22:31-34*)

³⁶Saimone Pitame baa lamaiyuo, Kamongo, emba anja parese? leya. Yesumi isingi lao, Namba paro dokona epapu moko minyuo eparami ingya nalyamo. Ingya napyamopape rakyame dokopa nakama eparami ingilyamo leya. ³⁷Pitame baa lamaiyuo, Kamongo akipamo emba pare dokona epapu kapa eparo ingya nalyase? Namba emba kumuo jero leya. ³⁸Yesumi baa isingi lamaiyuo, Embame namba kumuo jereje? Kinyi kinyi langilyu, kola kali pii lapa naramopa embame namba yuu remasa mata joo lare leya.

Namwa Yesu Keta Rakane Dokona Kando Nyerama

14 ¹Nakama mona rando karo nalapape. Anatu kapa ingingi lao suu pyao namba opetaeko suu pyao karalapape. ²Nambana Rakanena anda dokona panda malu silyamo. See napyali doko nakama kararami panda doko rapa rapa pyakala pelyo lapulisi? ³Dokona suu pyao nakama kararami panda doko pao rapa rapa pyakapala namba kararo dokona nakama opetae kararama lapala dee kamba epo dokopa nakama nyuo nambana arapunya karako leya. ⁴Dokona suu pyao nakamame namba anja paro kata doko singi kandale. ⁵Tomasame baa lamaiyuo, Kamongo, emba anja pare lao see nalyamano dokona kata angi doko apa pyuo kando nyeparamase? leya. ⁶Yesumi baa lamaiyuo, Namba kata angi dokope kinyinya renge dokope letena renge dokope karo. Mendali namba keta epa nara ramo doko Anatu karamo dokona kando nyii nara. ⁷Namba soo gisamili doko nambana Rakane doko opetae soo gisamiliko. Doko namba kandapala dokome baa opetae kando soo gisilyaminyi.

⁸Pilipame baa lamaiyuo, Kamongo, Rakange doko namwa lasaka pipi. Dokopa namwa mona seramopa kararama, leya. ⁹Yesumi baa lamaiyuo, Pilipa namba nakama pipya yuu andarele karengge dojo nakamame namba apisi lao soo gisa nalyamisi? leya. Mendalimi

namba kandapala dokome baa opetae kando soo gisilyaminyi. Doko suu pyao namwa Rakange lasaka pipi letene doko akipamo letese? ¹⁰Namba Rakanena arapunya karapunupa Rakane doko nambana keta karamo doko kinyilyamo lao suu pyaa nalyamisi? Pii langyuo karo doko namba rangeme sisu lao langyuo karonde daa. Rakane namba keta karapala banya yulu range pyuo karamo. ¹¹Namba Rakanena arapunya karapunupa Rakane nambana arapunya karamo langyalono doko kinyilyamo lao suu pyaa narami ramo doko dee nambana yulu andake dupwa kandapala kinyilyamo lao suu pyalapape leya. ¹²Kinyi kinyi langilyu, namba kapa ingingi lao suu pyao kararami dupwame namba pyuo karo yulu dopale pyuo kararami. Nambame Rakane karamo dokona parono dokona yulu kamame wakasako ingyuo pyuo kararami. ¹³Nambana kingi lao mende piso serami ramo doko namba pyakaro. Rakanena kingi doko namba keta ketae paramo karara. ¹⁴Nambana kingi lao mende piso serami ramo doko namba pyakaro.

Imambu Poo Pyasi Epara Lamaiya

¹⁵Nakamame namba kando mona reto kararami ramo doko nambana mawa pii dupwa elya pyuo minyuo kararamisa pira. ¹⁶Dokopa nambame Rakane kando atenja lakao kararonopa baame Nyisingi wakale akali Kinyi lenge Imambu doko julu joo jera. ¹⁷Isa wambu dupwame kanda napala see nao karaminyi dokome kapa nyerami ingyua nalyamo. Nakama range baa soo gisilyaminyi dokona lao baa nakama pipya karaminyi. Kararaminyipa baa nakamana mona anda dokona epapala palira.

¹⁸Nakama range iki karalapa lao yaki nyuo kaeyalu kaeyo kaeronde daa. Nakama kararami dokona epapala kaeyaro. ¹⁹Rengya usale dokona isa wambu munge dupwame namba dee kanda nalominyi. Dopa piraminyipape nakamame namba kandarami. Namba angi lete karo dokona nakama opetae lete kararami. ²⁰Namba Rakanena arapu dokona karelyonopa nakama nambana arapunya karaminyipa namba nakama pipya karo pilyu doko yuu gii mende pyaseramo dokopa nakamame soo gisarami.

²¹Mendeme nambana mawa pii soo nyepala suu pyao karamo dokome namba mona retapyamosa pilyamo. Dokona suu pyao mendeme namba mona retaramo doko nambana Rakane dokome baa mona reto kararamopa nambame baa mona reto nolakaronono dokopa namba kandara leya. ²²Jutasa (Isakeriote doko daa) baame lamaiyuo, Kamongo, apa pyuo namwa yeelyo kando nolakapala isa wambu dupwa kando nolaka narese? leya. ²³Yesumi baa isingi lamaiyuo, Akali mendeme namba kando mona retara ramo doko nambana pii warombo soo karara. Dokopa nambana Rakangeme baa mona retaramopa baa karara dokona nambwa epo baamoo pipya role pyao palu palirama. ²⁴Mendeme namba mona

reto kara nange doko nambana pii warombo soo kara napyasa pilyamo. Dokona suu pyao pii nakama silyaminyi doko nambanande daa. Rakane namba mapanyi peeyamo dokona pii.

²⁵Namba nakama pipya role pyao karamano dokopa pii dusipa langingi kandale. ²⁶Dopa pirunupape Nyisingi Imambu Poo Pyasi Rakaneme nambana kingi lao mapanyi peeyaramo doko pii peparae mana langyuo pii langilyu dupwa peparae nakama suu pyanyi pyambwakara.

²⁷Mona kyuuo lao singi renge doko nakama keta palena lapala jilyu. Namba rangena mona kyuuo lao singi renge doko nakama jilyu. Isa wambu dupwame mainginyili pyuo jilyunde daa. Nakama mona namba napala paka nao karalapape. ²⁸Namba pao kaepala dee nakama kararami dokona eparo lapunu doko selaminyi kandapi. Namba angi mona retamili doko Rakane karamo dokona pelene lao rae maiyuo karamili. Namba Rakanepa manda manjo kara nalyo. ²⁹Kinyi leelyamo lao suu pyarami lapala ene pipa napyamopa dopa pira lao langyilyu. ³⁰Isa wambu dupwana kamongo doko eplyamo dokona nambame pii malu dee langyuo kararo ingya nalyamo. Baame namba kando koo mende kapa pii nange. ³¹Pii nalyamopa nambame Rakane dokona mona reto karo doko isa wambu dupwa sinya lao nambame Rakane dopa piri lao lengenyili pyuo pyuo karo. Mona sipuralapa, leya.

Yesu Baa Girapo Isa Angingyuo Kareng

15 ¹Namba isa girapo marange angingyuo karelyonopa Rakange doko wangya dupwa pyakepanyi nembo elya pingi ingyuo kareng. ²Nambana wangya jingi angi lyii nange dupwa peparae baame pyakepanyi nembalu nembo nembenge. Wangya jingi angi lyingi dupwa peparae jingi lyulu lyuo karena lapala baame elya pyuo pyakepenge. ³Nambame pii langipu dokome nakama elya pisi karaminyi. ⁴Nambapa karo paka lakyuo paa nalapape. Dokopa namba nakama keta kararo. Wangya mende marangena sisingi dokona piso ando kara nara ramo doko rangeme sisu lao jingi lyii nara doko suu pyao nakama nambapa pako kara narami ramo doko nakama elyape keta kara narami.

⁵Namba girapo isa marange ingyuo karelyonopa nakama wangya ingyuo karaminyi. Akali nambana kararamopa namba banya mona anda palironopa jingi malu lyerasa pira. Dokona lao nakamame namba lakipa nyepala kararami ramo dokopa nakama mendepe pinya saka narami. ⁶Akali mende wangya ingyuo namba marangena sisingi dokona piso ando kara nara ramo doko baa nembaraminyipa kyapwara. Wangya kyapulyamo dupwa yapo nyepala isare dokona pyambuo yangarami ingilyamo. ⁷Nakama nambana kingi kapena kararaminyipa nambana pii dupwa nakama keta palira ramo doko mende pipuli yaka lao suu pyaraminyili pyuo piso selapape. Dokopa dokonako palyuo pyakao

karara. ⁸Jingi malu lyuo karo nambana disaepole ingyuo kararaminyi dokome nambana Rakangena kingi ketae pyambwaramisa pira. ⁹Rakaneme namba mona reto karapyamo doko suu pyao nambame nakama mona retoko karapu. Nambana mona kulisa retenge renge dokona sukusa karalu karo karalapape. ¹⁰Nambame Rakanena pii lengenyili pyuo warombo soo karo dokopa baapa mona reto karambano doko suu pyao nakamame nambana pii warombo soo kararaminyipa nambapa mona reto kararamasa pira. ¹¹Nambana rae maingi renge doko nakama keta palyuo simbwaramopa parami dokona lao pii renge dusipa polo langyalono.

¹²Nambame mawa palyuo dopa leto. Nambame nakama kando mona reto karapu doko suu pyao nakamame yango mendali mona retaro karalapape. ¹³Mendeme banya puu minyingi dupwa ama wakasa mona retapala dokome nakama nyiso kumuo maira ingilyamo. ¹⁴Nambame nakama pipya lao laronuli pyuo kararami ramo doko nambana puu minyingi ingyuo kararamisa pira. ¹⁵Kendemande akali dupwame nakamana kamongo dupwa apa pilyaminyi lao soo gisa nange renge dokona nambame nakama kando kendemande ingyuo karaminyi lao laa nalyo. Laa napunupape nambana Rakane pii namba langiyamopa soo nyiya dupwa peparae nakama polo langyuo karapu dokona nakama nambana puu minyingi lalono kandapi. ¹⁶Nakamame namba yapalyapa nayaminyipa nambame nakama yapalyuo nakama wangya ingyuo jingi lyuo karala paraminyipa jingi dupwa lyuo karalu karena lao rombo palyiyu. Dopa pyuo kararami dokopa Rakaneme mende pyakana lao piso seraminyili pyuo pyakao karara. ¹⁷Mendeme mendali mona reto karalapape lao dokona mawa pii langilyu.

Isa Enda Akalipimi Nakama Awa Nalyaminyi

¹⁸Isa enda akalipimi nakama awa nayami kande dokopa, namba wambo awa nayaminyili pyuowako awa nalyaminyi lao soo nyelapape. ¹⁹Nakama isa wambunya yongo nyuo karamili dokopa isa wambu dupwame nakama namwana rangelyamo lapala mona reto karamili. Doko doŋo nambame nakama yapo niyunupa nakama mee sisi panda ingyuo karaminyipa isa wambu yango dupwa nakama kando awa nalyaminyi. ²⁰Wambo pii mende langyalono kandapi doko suu pyalapape Kendemande akali banya kamongo kando wakasa ingya nange langyalono. Doko suu pyao namba randa joo kareyami ramo doko nakama randa jooko kararami. Nambana pii minyuo kareyamili ramo doko nakamana pii minyuo pyuoko kararamili. ²¹Nakama randa jerami dokopa namba mapanyi peeyamo doko soo gisa napala nakama namba reke lao randa joo kararami. ²²Namba epa napala koo keyangepe pakana palyuo mana lamai napuli doko nakama yulu koo kamenge pimisa

pii mende pali napyali. Dakepa nambana pii see napala koo piyama larami ingya nalyamo. ²³Mendeme namba kando awa nara ramo doko nambana Rakange opetaeko awa narasa pira. ²⁴Nambame nakama pipya karo wambu mendeme yulu pii nange dopale pyuo kara nayoli doko nakama koo keta paa nayamili. Doko nakama nambana yulu andake dupwa kando kaepala nambapa nambana Rakangepa kando awa naoko karaminyi. ²⁵Namba kandakinyuo awa nayami, dopa lao Mawa Pii pyasi doko palamo pii dokona pyaka silyaminyi.

²⁶Kinyinya Renge Palenge Nyisingi Imambu doko Rakane keta karenge doko epara. Baa Rakane role pyao karenge doŋo nambame baa dae pena laronopa baame nambaja lao rolo langira. ²⁷Nakama wambo kanda soo nambamoo pipya kareyama dokona ingyuo nakama dopako pyuo nambana lao polo lao kararami.

16 ¹Nakama suu longo paa nalapape lao pii dusipa peparae langyalono. ²Kinyi kinyi langilyu, yuu gii epara ingilyamo dokopa nakama sinakoke anda dupwana neta nembarami. Mendeme nakama pyao kumakapala dokopa Anatunya yulu dokona pipusa pilyamo lao suu pyarami. ³Rakangemoo nambamoo soo gisa napala dokona dopa pirami. ⁴Dopa pirami doko nambwa Rakanepa soo gisa napala nakama pyarami yuu gii pyaka seramo dokopa dopa langii kande lao suu pyarami dokona langyalono.

Imambu Poo Pyasinya Yulu Doko

Wamba role pyao kareyama dokopa pii dapwa langya nayo. ⁵Doko dakepa namba mapanyi peeyamo doko karamo dokona range pelyo. Paronopape nakama mendalimi anja pelene lao piso see nalyaminyi. ⁶Epapu rolo langyalono dokona nakama monarena kondome kumulyaminyi. ⁷Kondalyaminyako doŋo nakama kinyi langilyu, namba kanjakala parono dokopa nakama elyape keta palirami. Namba kanjakala paa naro ramo doko Nyisingi doko nakama keta epa nara. Paro ramo doko nambame baa nakama keta mapanyi peeyakaro. ⁸Baa epapala dokopa isa wambumi yulu koo dokonape yulu rolae dokonape Anatunya kote pii dokona kyai pyuo suu pyaro karaminyi doko pananyi pyambwara. ⁹Isa wambu dupwame namba kapa ingingi lao suu pyaa nalyaminyi dokona palyuo baame nakamana koo doko nolakakamira. ¹⁰Namba Rakange karamo dokona paronopa nakamame namba dee kando narami dokona lao baame yulu rolae angi doko lasaka pira. ¹¹Anatumi isa wambu dupwana Kamongo doko kando kote lapyaja lao doko lyakai pyuo panaramo serami.

¹²Nambame nakama pii malu langiru ingyapyamopape nakama kapa soo nyii narami ingilyamo. ¹³Kinyi lengena Imambu doko epapala dokopa baame nakama pii kinyi peparae mana langira. Dokona lao

baame range sisu lao larande daa. Baa renge seramuli pyuo polo langyuo karara. Baame ene pipa nalyamo dupwa wambo nolakao lao karara. ¹⁴Baame nambana dupwa nyepala mana langyuo dokome namba keta pyambwarasa pira. ¹⁵Rakangena kingi rakapana silyamo dupwa peparae nambanaŋa. Dokona lao Imambumi renge lamairunu dupwa nyepala nakama langira ingilyamo langyalono kandapi.

Wambo Kondapala Enakana Rae Maiyuo Parami Leya

¹⁶Rengya usale nakamame namba dee kanda narami. Dee mee mende usale dokopa namba kandarami, leya. ¹⁷Leyamopa banya disaepole dupwana lapo nakama lao dopa leyami. Baame namwa langilyamo doko aki pii langilyase? Usale nakamame namba kanda narami, dee mee mende usale namba kandarami. Rakange karamo dokona paro ingilyamo dokona kanda narami langyalamo kandapi, leyami. Kandarami letamo doko akinde letase lao see nalyamano leyami. ¹⁸Baame, Usale dokopa kandarami lalamo doko apa pyuondena lalamo kandapisi? Apa pyuondena lalamo lao saka nalyamano, leyami. ¹⁹Yesumi baa piso selana leyami doko. Sepala baame nakama dopa lamaiya. Usale namba kanda narami, dee mee mende usale namba kandarami lalono dokona apa pyuondena lalepe lao nakama range sukusa piso silyamisi? ²⁰Kinyi kinyi langilyu, nakama ee lao ipwakuku nyeraminypa neta wambu dupwame rae maiyuo kararami. Nakama kondo kararaminyipape enakana raeko maiyuo kararami. ²¹Enda mende wane mata pilyamo dokopa rangena yuu gii doko pyaka sipyalamo lapala mona randange. Dopa pilyamopape wane doko manjo nyepala dokopa raeko maipala baa randa neyamo dupwa nyuo kame singi. ²²Doko suu pyao epapu nakama kondome kumuo karaminyi. Dopa pilyaminyipape nambame nakama dee epo kandarono dokopa nakama monarena pyakalyuo pyaramo kararami. Dokopa mendalimi nakama monarena pyakalyuo pyaramo renge doko rekye lao nyeraminde daa.

²³Yuu gii dokopa nakamame namba mende piso see narami. Kinyi kinyi langilyu, Rakange doko kando mende piso serami ramo doko baame nambana kingi reke lao kapa jera. ²⁴Wamba nambana kingi dokona lao piso see nayami. Monarena pyakalyuo pingi renge dokome simbuo pyoko pyoko lena lapala piso selapape. Dokopa kando nyerami ingilyamo.

Yesu Baame Isa Yulu Dupwa Anamasi Miniyia

²⁵Nambame kongwalu lalya lana pyuo langyalono. Yuu gii mendepa nambame kongwalu pii dupwa kaepala Rakange dokona rolae lao langiru. ²⁶Yuu gii dokopa nambana kingi lapala piso serami. Dokopa nambame nakamana lao atenja lakaro laa nalyo. ²⁷Nakamame namba

mona reto Rakane karamo dokona karo epee lao suu pyao karaminyi dokona Rakane baa rangeme nakama mona reto karamo. ²⁸Rakane karamo dokona karo epapala isa yuu dakena epeyo. Dopa pipala isa yuu dake yaki nyuo Rakane karamo dokonako pelyo, leya.

²⁹Banya disaepole dupwame, Yuu gii dakepa emba kongwalu pii dokona kaepala rolae lalenyamo doko kandelyamano. ³⁰Embame peparaee soo gisingilyamo lao mendeme embena pii doko kinyi lyasilisi lao piso sepenge ingyapa nalyamo lao epapu namwa soo kaelyamano. Dokome emba kinyi Anatu karamo dokona karo epeelyamo lao suu pilyamano leyami. ³¹Dokopa Yesumi nakama lamaiyuo, Epapu nakama kinyilyamo lao suu pilyamisi? ³²Yuu gii mende eparamo dokopa nakama bolombalo lao anda palengenyili pyuo paraminyipa namba iki kararo. Kinyi kinyi, yuu gii doko epapu pyaka silyamo. Namba iki kararoko doŋo Rakane nambapa kararamba dokome iki ingyapa nara. ³³Nambana arapu dokona kararami dokome nakama mona kui lao sinya lapala pii doko langyalono. Yuu dakena karo randa narami. Nambame isa yuu dake anamasi minyuo karo doko kandapala mona kuki palyuo karalapape, leya.

Yesumi Banya Disaepole Dupwana Lao Ateŋa Lakamiya

17 ¹Yesumi pii dupwa lapala yake doko kandalyuo kandapala dopa leya. Rakane, yuu gii doko pyaka sipyalamo. Embame embena Ikinyi ketae pyambwarenepa baame emba ketae pyambwara ingilyamo. ²Dokona lao embame wambu baa maiinyi dupwa peparaee baame kyakana reŋge kulisa palu palenge doko maira lapala embame baa isa wambu dupwa peparaee iso karena lee. ³Isa wambumi emba Anatu angi kareŋge dokome Yesu Koraisa mapanyi pee doko kando serami doko kyakana reŋge kulisa doko nakama keta palira. ⁴Isa yuu dakena karo yulu jiinyi doko nambame pyuo otapunupa dokome emba ketae pyambwasi karamo. ⁵Rakane, isa yuu doko ene wasa nange siyamo dokopa embapa nambapa yanga paupau lao kareyamba dokona suu pyao embena lenge kambu seramo dokona kararonopa embame namba yanga paupau lany pyambwape.ⁿ

⁶Embame isa wambu lapo yapo nyepala namba jiinyi dupwa embena kingi lamaiyunupa soo nyiyami. Dupwa embena ingyuo kareyaminyipa embame namba jiinyipa embena pii doko warombo soo karaminyi. ⁷Yulu jiinyi dupwa peparaee embena ingilyamo doko soo kaelyaminyi. ⁸Dokona lao nambame pii jiinyi dupwa nakama lamaiyunupa nakamame soo nyepala kinyi kinyi emba kareŋge dokona namba karo epeelyamo lao sepala embame namba mapanyi pee lao suu pyao karaminyi.

ⁿ 17:5 Yesu yake doko kandalyuo kandapala dopa leya. (17:1)

⁹Nambame nakamana lao atēja lakamilyu. Mee isa wambu dupwana lao atēja lakami nalyo. Wambu embame jiinyi dupwa embena ingyuo karaminyi dokona nakama suu pyao atēja lakamilyu. ¹⁰Nambana ingyuo karaminyi dupwa peparae embena. Dee embena ingyuo karaminyi dupwa peparae nambana. Dopa pyuo karo nakamame namba ketae pyambuo karaminyi. ¹¹Epau isa yuu dakena angi ingyuo kara nalopono. Kara napala emba karene dokona eparo ingyapyamopa nakama isa yuu dakena karaminyi. Rakane poo pyasi embena kingi porai renge paleta lasi namba keta jiinyi dokome nakama kyawa minyuo karape. Minyuo kararenepa nambwa mendaki ingyuo karambano doko suu pyao nakama opetae mendaki ingyuo karenale. ¹²Nakama pipya role pyao karamwano mange dokopa embena kingi yaki nyii nana lao embena arapu dokona karenale lao iso karapu. Nambame nakama rapu pyuo karapunupa nakama karaminyi dokona mende kwao pupyande daa. Akali mendakindeme kwao para ingingi doko Baepolena leyamuli pyuo isa peya. ¹³Dopa pipyamopape epau emba karene dokona epelyo. Doko nambana mona pyakalyuo pingi renge doko nakama keta palena lapala pii dapwa isa yuu dakena lao karo. ¹⁴Nambame embena pii doko nakama lamaiyu. Namba dae yuu range ingya nao karo doko suu pyao nakama opetae mee sisi panda ingyuo karaminyi dokona isa wambu yango dupwame nakama epekanda nao karaminyi. ¹⁵Nakama isa yuu dokona karaminyi dokona rekya lao nyakape lao atēja lao letonde daa. Koo dokome rambu lasara lao kyawa minyuo karape lao atēja leto. ¹⁶Namba dae range ingya nao karo doko suu pyao nakama dae range ingya napyamoko karaminyi. ¹⁷Embena pii kinyinya renge dokome nakama yapo nyerenepa embena ingyuo pena. ¹⁸Embame namba isa yuu dakena mapanyi peene doko suu pyao nambame nakama isa yuu dupwana mapanyi pyambuyu. ¹⁹Nakama embena wambu yapasi angingyuo pena lao namba range kame soo kaepala embena iki karo.

²⁰Akali dasipana iki atēja lakamilyunde daa. Nakamame pii lamairaminyi sepala namba kapa ingingi lao suu pyapala mona jerami dupwana opetaeko lakamilyu. ²¹Nakama peparae mendaki ingyuo karamili lapala atēja lakamilyu. Isa wambu dupwa emba namba mapanyi peelyamo lao suu pinya lapala Rakane emba namba keta karapinyipa dee namba emba keta karo doko suu pyao nakama opetae nambwa keta karamili lao suu pyao leto. ²²Nambwa mendaki ingyuo karambano doko suu pyao nakama mendaki ingyuo karamili lapala embame namba yanga paupau lenge renge jiinyi doko nambame nakama maiyu. ²³Nakama mendaki ingyuo karamili lapala emba namba keta kararenepa namba nakama keta kararo. Dokopa isa wambu dupwame embame namba mapanyi peeyapala namba mona retenge doko suu pyao nakama mona reto kareneko lao soo gisarami.

²⁴Rakane, wambu namba jiinyi dusipa namba kararo dokona nakama opetae role pyao karamwali lao leto. Karo dokopa isa yuu ene pyuo wasapa naenepa embame namba mona retapala yanga paupau lenge renge jii doko nakama kandarami. ²⁵O Rakane rolae pingi doko, isa wambu dupwame emba soo nyepa naminyipa nambame emba soo nyuo kaepunupa wambu lapome iki embame namba mapanyi peelyamo lao soo gisilyaminyi. ²⁶Embena kingi doko namba lamaiyuo doko dee lamaiyuo karalu kararoko ingilyamo. Dokome embame namba mona reto karene doko nakamana ingyara. Ingyaramopa nambame nakamana mona anda kararo.

Yesu Puu Maiyami

(Mat 26:47-56; Mak 14:43-50; Lu 22:47-53)

18 ¹Yesu pii doko lapala banya disaepole dupwa pipya netarena pao yuu pota Kitone lenge doko nyuo yalo ee mendena pao sukusa peyami. ²Yesu banya disaepole dupwa pipya yuu gii malu yuu dokona malu palyuo pisipa piyami dokona Jutasa baa mata kando leyamo doko opetae yuu doko kando soo kareya. ³Soo karapala baame purisi akali mupwa dupwape Parisi dupwapeme yanda singi lapope yanda singi mupwa mendasipape nyepala lambepe kendapulipi kakupi wua gelape lapo nyuo minyuo pao yuu dokona peyami. ⁴Dokopa Yesu baa keta piramo yulu dupwa peparae soo gisapala lenge kambu siyamo dokona epapala nakama lamaiyuo, Api kotelyaminyi? leya. ⁵Nakamame isingi lao, Yesu Nasarete range doko, leyami. Yesumi nakama lamaiyuo, Doko namba, leya.°

Jutasa baa mata kando leyamo doko nakama role pyapeta kareyami. ⁶Doko namba, lamaiyamo dokopa nakamame matanono papala yuunya paro siyami. ⁷Baame dee piso soo, Api kotelyaminyi? leya. Dokopa, Yesu Nasarete range, dokoŋo leyami. ⁸Yesumi isingi lamaiyuo, Doko nambaŋa langyalono lao kandapi doko namba kotarami ramo doko akali dasipa mee neta pena kaeyalapape leya. ⁹Baa wambo Anatu kando wambu jiinyi dusipana mendali kwao pakapyande daa, leyamo dokona palyuo leya. ¹⁰Dokopa Saimone Pitame banya wua gela mandeyamo doko kolo nyepala purisi mupwa dokona kendemande akali dokona kale rolaerename doko pyao rekya lanyi nembeya. Kendemande akali dokona kingi Malakasa lenge. ¹¹Yesumi Pita lamaiyuo, Embena wua gela doko palenge dokona palyape. Rakaneme pee kapo namba jipyamo dokona naa narose? leya.

Anasa Baame Yesu Kando Kote Leya

¹²Dokopa yanda singi malu epeyaminyi dusipa dusipana mupwa dokomoo Juu wambunya yanda singi dusipapeme Yesu minyarapala puu

° 18:5 Yesumi nakama lamaiyuo, Doko namba, leya. (18:5)

maiyami. ¹³Puu maipala Anasa kareyamo dokona lanyuo peyami. Anasa baa Kayapasana imwange ingyuo kareyamopa Kayapasa baame ee kana dokona purisi mupwa ingyuo kareyamo dokona Anasa dokona wambo lanyuo peyami. ¹⁴Akali mendaki wambu dupwana lao kumara dokopa nakama kapa ingyuo palira leyamo pii doko Kayapasa ingyuo leya.

Pitame Yesu Mata Maiya

(Mat 26:69-70; Mak 14:66-68; Lu 22:55-57)

¹⁵Saimone Pita disaepole mendepa Yesu peyamo dokona mata pyao peyambi. Disaepole mende doko purisi mupwa wakasa dokome kandenge dokona baa purisi mupwa dokona anda kamapi sukusa kapa peya.

¹⁶Dokopa Pita baa kakota lumbungisa kareya. Dokopa disaepole mende doko purisi mupwa dokome kandenge doko netarena papala kendemande enda kakota lumbungi iso kareya doko lamaipala Pita sukusa epena leya.

¹⁷Kendemande enda kakota lumbungi isa kareya dokome Pita lamaiyuo, Emba akali dokona disaepole mende daase? leya. Pita baa, Namba daa, leya.

¹⁸Kendemande wambu dusipape yanda singi dusipape kupwa piyasa isare lengya rena lapala soo kareyami. Pita baa opetae nakama pipya karo isare soo kareya.

Purisi Mupwa Dokome Yesu Piso Siya

(Mat 26:59-66; Mak 14:55-64; Lu 22:66-71)

¹⁹Dokopa purisi akali mupwa dokome Yesu banya disaepole dusipanape banya mana pii dokonape baa piso sepa piya. ²⁰Yesumi baa isingi lamaiyuo, Nambame isa wambu dupwa panembena karo lamaingi, sinakoke anda dupwanape tembole dokonape Juu wambu peparae elyambu pingi panda dusipanape namba mana lamaiyuo karo pii mende yalu pyuo lengende daa. ²¹Akipamo namba piso silisi? Nambana pii siyami wambu dupwa nambame apa lenge lao piso sepe. Nambame lao karenge doko nakama soo kaenge, leya. ²²Dopa leyamo dokopa yanda singi kareyaminyi dokona mendeme kingi kapeme Yesu rakyuo pyapala, Embame dopa lao purisi mupwa doko isingi lamaingisi? leya. ²³Yesumi baa isingi lamaiyuo, Nambame kopetame lapu ramo doko pii kwaelyamo doko polo lalase. Rolae nembo lapu ramo doko akipamo namba rakyuo pyalese? leya.

²⁴Dokopa Anasame, Kayapasa purisi mupwa wakasa karamo dokona Yesu baa puu maisi piso karena lapala lanyuo pupwape, leya.

Pitame Namba Yesu Kanda Nange Daako Lao Dee Kamba Leya

(Mat 26:71-75; Mak 14:69-72; Lu 22:58-62)

²⁵Saimone Pita baa isare soo kareya. Dokopa role pyao kareyami dupwame baa lamaiyuo, Emba doko banya disaepole dokona mende daase? leyami.

Dokopa baame, Ama daa leya. ²⁶Purisi akali mupwa dokona kendemande mende Pitame kale pyao rekya lanyi nembakamiya dokona ree palu mendeme baa piso soo, Emba ee dokona baa role pyao karambinyi kandapu doko daase? leya. ²⁷Pitame dee Daako, leya. Aopa dokopa kola kali pii leya.

Pailateme Yesu Kando Kote Leya

(Mat 27:1-2, 11-14; Mak 15:1-15; Lu 23:1-5)

²⁸Dokopa wamba kukwa Kayapasana anda doko kaepala Yesu lanyuo kyapona kote singi anda dokona peyami. Nakama rangeme Juu wambunya yulu suu pyao namwa elyape ingya naramosa Pasopa nenge kapa naa nasarama lapala kyapona kote singi andakare dokona paa nayami. ²⁹Paa nayamisa Pailate nakama kareyami dokona kamanda papala, Akali dake kando aki yulu koo pipyana lao epelyaminyi? leya. ³⁰Nakamame baa isingi lamaiyuo, Akali dakeme yulu koo mende pii nange pyali doko embena panda peeya namwali leyami. ³¹Pailateme nakama lamaiyuo, Nakama range baa nyepala nakamana mawa pii dupwana lao range kambuyanda pipwape leya. Leyamopa nakamame namwa Juu akali dupwame akali mende pyao kumakarama ingyuo mawa pii dokona pali nalyamo leyami. ³²(Yesu wamba namba dopa pyuo isa dokona pyarami lao reteyamo dokona palyuo leyamisa piya.)^p

³³Pailateme kyapona kote singi anda dokona dee papala Yesu epena lapala, Emba Juu wambunya Kiñisi? lamaiya. ³⁴Yesu isingi lao, Embame range maso letepe panda lapome namba lao langiminyi letese? leya. ³⁵Pailate isingi lao, Namba Juusi? Embena wambu dupwamepe purisi mupwa dusipamepe emba namba keta peeyalaminyi kandapi. Emba aki mende pipisi? leya. ³⁶Yesumi isingi lao, Nambana isingi yulu doko dae isa panda pali nalyamo. Nambana isingi yulu doko isa pandana yulu ingyuo pupyali doko nambana yulu pingi akali dupwame Juu wambu keta namba nyuo peeya nana lapala pyakando pimili. Nambana isingi yulu doko isa wambunya yulu dopale ingyuo paa nalyamo leya. ³⁷Leyamo sepala Pailateme Emba kiñi lyasilisi? leya. Yesumi isingi lao, Embame namba kiñi lalene kandapi. Kinyi lengena renge polo lao kararo renge mendaki dokonako isa panda dakena namba manjo nyiyami. Wambu kinyi lengena renge wambu keta karaminyi dupwa peparaeme nambana pii soo karenge, leya. ³⁸Pailateme, Kinyi lengena renge doko apiyakalese? leya.

Pailateme Yesu Kapa Pinya Leya

(Mat 27:15-31; Mak 15:6-20; Lu 23:13-25)

Dopa pyuo leyamopa Pailateme Juu wambu kareyami dokona neta papala, Akali doko yulu koo mende pipya lao soo kanda nalyo. ³⁹Dokoko

^p 18:32 Emba kiñi lyasilisi? leya. (18:37)

dojo nakamana yulu mende singi kandale doko nenge Pasopa nenge gii dokopa akali mendaki namba mokwakapa pingi. Doko suu pyao Juu wambunya Kiŋi doko mokwakapili lao suu pilyamisi? leya. ⁴⁰Dopa leyamo dokopa nakamame poraiyuo kaeyo lapala, Akali dake daa, Barapasa mokape, leyami. Barapasa baa kendepo nenge akali ingyuo kareya.

19 ¹Dokopa Pailateme Yesu nyuo pyaroko pinya leya.

²Dokopa yanda singi dupwame nepereke lapome minyuo kamenyongwapala lengyapu pipala banya kyawa dokona pee pyakamipala baa komau konele mende bolembale lakamiyami.

³Lakamipala baa kareya dokona epapala, Emba Juu wambunya Kiŋi doko karalenelyamo, lapala baa kingi kapeme piyami.^q

⁴Juu wambu kareyami dokona Pailateme kamanda dee papala, Baa koo mende pii napyaja lao soo kandapilyamo lao selapase, lapala, Nakama karaminyi dokona baa potemo lanyuo epelyo kande, leya. ⁵Dokopa Yesu nepereke lengyapu pisi pee piro karo komau konele bolembale laro karo piyamopa kamanda epeya. Pailateme nakama lamaiyuo, Akali laminyi doko dake, leya. ⁶Purisi akali mupwa dupwape yanda singi dupwapeme wangonali pyuo lapala, Baa isa mamandona pyao palya, baa isa mamandona pyao palya, leyami. Pailateme nakama lamaiyuo, Nambame baa koo mende pii napyaja lao soo kandapunupape nakama rangeme baa nyepala isa mamandona pyao palyalapape, leya. ⁷Juu akali dupwame baa lamaiyuo, Baa Anatunya Ikinyingi ingyuo karo lapyamosa dokona namwana mawa pii mende palamo dokome baa kumara ingilyamo leyami.

⁸Dopa leyaminyi sepala Pailate dee pakaya. ⁹Pakapala kote singi anda dee kolando papala Yesu lamaiyuo, Emba anja karo epee? leya. Dopa leyamopa Yesumi isingi mende laa naya. ¹⁰Dokona Pailateme baa lamaiyuo, Namba pii mende langiri ingya nalyase? Emba mokwaro dokope isa mamandona pyao palyaro dokope range doko namba keta palamo lao emba see nalesa? leya. ¹¹Yesumi baa isingi lamaiyuo, Embame namba kando mende suu pilyu ote lao kapa piro lao karene renga porai doko Ketaerena dokome emba jii napyali doko embame mende piri ingya napyali. Dokona namba nyuo emba jipyamo akali doko koo wakasa pipya ingilyamo.

¹²Dopa leyamo dokopa Pailateme baa mokwalana piya. Dopa piyamopape Juu wambu dupwame pii porakaiyuo kaeyo lapala, Akali doko embame mokware ramo doko embame Sisa puu minya naresa pira. Akali mendemepe namba kiŋi ingyuo karo larami dupwa Sisa kando sisu nyuo kararasa pira leyami. ¹³Dopa leyaminyi sepala dokopa Pailate

^q 19:3 Emba Juu wambunya Kiŋi doko karalenelyamo, leyami. (19:3)

Yesu kamanda lanyuo papala panda mende Kaname Rambi Kwaasi lenge dokona pao peteya. (Panda doko Ipuru pii lao Gapara lenge.)

¹⁴Pasopa nenge narama lao rapa rapa pingi andawai korokama towalo keloke ingyuwale gii doko pyaka siya. Baame Juu wambu dupwa lamaiyuo, Dake nakamana kiŋi akali, leya. ¹⁵Nakamame wangonapi pyuo lao, Baa pyao nemba, pyao nemba, isa mamandona pyao palya leyami. Pailateme nakama lamaiyuo, Nakamana kiŋi doko isa mamandona pyao palyakarolyase? leya. Purisi mupwa dupwame isingi lamaiyuo, Sisa baa iki namwana kiŋi ingyuo karapyamopa mende kara nalyamo leyami. ¹⁶Dokopa baa kapa isa mamandona pyao palyarami doko kapa lao nakama maiya.^r

Yesu Isa Mamandona Pyao Palyiyami
(*Mat 27:32-44; Mak 15:21-32; Lu 23:26-43*)

¹⁷Dokopa Yesu nyiyaminyipa baa range banya isa mamando doko soo netarena pao yuu kingi Kyawa Kuli lenge (Ipuru pii lao Golokota lenge) dokona peya. ¹⁸Dokona baa isa mamandona pyao palyiyami. Akali lama opetae Yesu kanya dokona paleyamopa dolapo parali dolapona pyao palyiyami. ¹⁹Pailate baame pii renge dokona pepa pyapala isa mamando doko pyanyi palyiya. Yesu Nasarete range Juu wambunya Kiŋi lao pyasi paleya. ²⁰Yesu isa mamandona pyao palyiyami yuu doko anda malu palyuo karengé dokona repeta siyamo dokome Juu wambu malumi pii doko kando yaka leyami. Pii doko Ipuru pii Orome pii Giriki piipi dusipana lao pyasi paleya. ²¹Dokopa purisi mupwa dupwame Pailate lamaiyuo, Juu wambunya Kiŋi, lao palyapi doko kaepala, Akali dakeme namba Juu wambunya Kiŋi lapyá, lao pyape leyami. ²²Pailateme lao, Pii pyapu doko pyalu pyao pyapu, leya.

²³Yanda singi dusipame Yesu isa mamandona pyao palyapala banya komau dusipa nyepala nakama akali kisima suu pyao bange kisimasa lao malu palyuo sereyami. Dopa piyaminyipape banya pee pingi londe doko kii pyuo wapwa napala mee wapwalu wapuo wapuyami doko kando dopa leyami. ²⁴Pilya namane, lapala apimi embone piso nyera lao yulu mende pyuo piyami. Pii pyasi doko,

Nambana komau pingi dupwa mokwa soo nyiyami.

Nyepala nambana komau doko apimi embone piso nyera lao mende pyuo piyami,

paleyá. Pii pyasi paleyamuli pyuo yanda singi dusipame piyami.

²⁵Dopa piyaminyipape Yesunya isa mamando repeta dokona banya endangimoo endanginya kakingi dokomoo Maria Kiliopasana etenge dokomoo Maria Makatala range dokomoo kareyami. ²⁶Yesumi banya

^r 19:16 Yesu baa range banya isa mamando doko soo netarena peya. (19:17)

endangipa disaepole mende baame mona reteya dokopa repeta kareyambinyi kandapala endangi lamaiyuo, Enda, embena ikinyi kandape leya. ²⁷Lapala disaepole doko lamaiyuo, Embena endakinyi dolo karamo kandape leya. Dokopa disaepole dokome enda doko banya anda dokona lanyuo pao piso karo piyambi.^s

Yesu Kumuya

(*Mat 27:45-56; Mak 15:33-41; Lu 23:44-49*)

²⁸Enakana Yesumi banya yulu peparae dupwana lumwa pyaamo lao soo gisapala pii pyasi paleyamuli pyuo dopa leya. Namba nano pilyamo leya. ²⁹Pere warake mendena waene ipwange kau pingi simbuo peteyamopa dusa siya. Siyamo dokona isa lumbi mende waene dokona poeyo nyepala isa kingi isope lenge dokona buwakiki pipala banya kambu dokona suu leyami. ³⁰Yesumi waene kau pingi doko napala baame lao, Pyuo otalyano leya. Lapala ayemba pongwa napala kumuyamopa imambu rekya lao peya.

Kaku Dokome Yesu Arikyuo Piya

³¹Yuu gii rapa rapa pingi angi doko pyaka siyasa koro petenge pyaka selana piyamo yanenge kaoma dusipa yuu gii koro petenge dokopa isa mamandona palyuo kara nami lapala Juu akali dupwame Pailate piso soo, Nakamana kimbu pyao roo pyapala yanenge kaoma dusipa nyuo neta kakondenale leyami. ³²Dopa leyamininyi dokona yanda singi dusipame epapala akali dalya kaepeta paleyamo dokona kimbu wambo pyao roo pyapala akali mende baa role pyao isa mamandona pyao palyiyami dokona kimbu opetae minyuo roo piyami. ³³Roo pyapala, Yesu paleyamo dokona epapala baa kumapapyalyamo lao kandapala banya kimbu pyao roo pyaa nayami. ³⁴Roo pyaa nayaminypape yanda singi dokona mendeme banya mamanda doko kakumi arikiya. Dokopa ipwange ranjamape pale pale epeya. ³⁵Dopa pyuo piyamininyi kandeya akali dokome nakama opetae kinyi leelyamo lao suu pyalapape lao rolo leya. Banya rolo lenge pii doko kinyi keta karelyamopa kinyi letono lao soo gisingi. ³⁶Kuli roo pyao pii nayami doko, Banya kuli mendepe roo pyao pii nara, lao Baepolena paleyamuli pyuo piyami. ³⁷Dee, pii pyasi mende dopa lao palamo, Akali mende arikyarami doko kando kararami.^t

Yesu Malu Piyami

(*Mat 27:57-61; Mak 15:42-47; Lu 23:50-56*)

³⁸Enakana dokopa Josepe Arimatia range doko Yesunya disaepole dojo Juu wambu dupwa kando pakapala wakale mende ingyuo

^s 19:27 Pyuo otalyano leya. (19:30) ^t 19:37 Yesunya yanenge komaukeyange dokome yama piyami. (19:40)

dupwana kareya dokome Pailate piso soo, Yesunya yanenge kaoma nyuo minyuo kakondarowale leya. Dokopa Pailate, Kapa leya. Dopa leyamo dokopa baame epapala banya yanenge kaoma doko nyuo minyuo peya. ³⁹Nikotimasa wamba Yesu kareyamo dokona kukwa mendepa epeya doko baame rendamu pingi bange mwua lenge dokopa luli lenge isa mendepa alose lenge dolapo minyuo kiminjasi ama kenda malu doko minyuo epeya. ⁴⁰Nakabame Juu wambunya wambu malu pinginyili pyuo Yesunya yanenge kaoma doko nyuo luli lenge bange palyuo komau keyange dokome yama piyami. ⁴¹Baa isa mamandona pyao palyiyami yuu doko ee repeta. Ee dokona malu anda mende wambu mendali malu pipa nangende siya. ⁴²Juu wambu dupwame dee yangama dokopa koro andake pyaka sera lao rapa rapa pingi yuu gii doko pyaka siyasa malu anda doko repeta siyamosa Yesu dokona palyiyami.

Yesu Malu Anda Dokona Pana Naya
(*Mat 28:1-8; Mak 16:1-8; Lu 24:1-12*)

20 ¹Koro andake dokopa wamba kukwa yuu ene iminjo yango piyamo dokopa Maria yuu Makatala range doko malu piyami anda dokona epapala malu anda kambu dokona kana upi leyami doko nyuo kakondasi siyamo kandeya. ²Kandapala makando Saimone Pita disaepole mende Yesu mona reteyamo dokopa kareyambinyi dokona peya. Papala nakamba lamaiyuo, Kamongo doko malu anda dokona neta nyimilyamo. Doko anja retami lao namwa see nalyamano leya. ³Pii doko sepala Pita disaepole mende doko opetae potemo epapala malu piyami anda dokona peyambi. ⁴Pao nakamba laparae makando papalape disaepole mende dokome Pita nyuo enakapala malu piyami anda dokona wambo epeya. ⁵Epapala koko kandalana pangu sepala komau keyange dolapo siyamo kandeya. Kandapalape andakare paa naya. ⁶Dokopa Saimone Pita baa enakana epapala malu anda andakare peya. Pao komau keyange angi yaki piyami doko kandeya. ⁷Kandeyamopa komau kyawa yaki piyami dokopa komau wakale mende dokopa mendakinya see napala wakale dumbisale kyasala pao siyamo kandeya. ⁸Dokopa disaepole mende doko malu anda dokona wambo epeyamo doko opetae kolando peya. Pao kandapala kinyi baa lopo pupyalyamo lao suu piya. ⁹Baa kumuo palipala sipuro epara ingyara, lao pyasi palenge kandale pii doko yuu dokopa ene sepa nao kareyambi. ¹⁰Disaepole dolapo doko kandapala dee kapu kyuo anda peyambi.

Maria Yuu Makatala Range Doko Yesu Kandeya.
(*Mat 28:9-10; Mak 16:9-11*)

¹¹Maria malu anda dokona kama karo ee lao kareya. Ee lao karo malu anda dokona koko kandeya. ¹²Dokopa ajala kakepame lama wamba

Yesunya yanenge siyamo dokona peteyambi kandeya. Mende kyawa siyamo dokona piso mende kimbu siyamo dokona piso piyambinyi kandeya. ¹³Nakambame baa lamaiyuo, Enda apa pipyasa ee lao karene? leyambi. Dokopa baame nakamba lamaiyuo, Nambana Kamongo nyepala pumisa anja retami lao saka napala ee lao karo leya. ¹⁴Dopa lapala kapu kyepala Yesu kareyamo kandeya. Kandapala Yesu baa lao see naya. ¹⁵Yesumi baa lamaiyuo, Enda, emba apa pipyasa ee letene? Api kotelene? leya. Baame ee rapu pingi akalilyamo lao masapala doko lamaiyuo, Aeya, embame baa soo pare ramo doko dusa retapu lao namba langipi. Langirinyipa nyepala lanyuo paro leya. ¹⁶Yesumi baa kando, Maria leya. Leyamopa Maria kapu kyepala Yesu baa kando Ipuru pii lao, Oraponai leya (pii doko Mana Lenge dopale.) ¹⁷Yesumi baa lamaiyuo, Embame namba minya kae. Namba Rakane karamo dokona ene pulyuo papa nalyo. Nambanape nakamanape Rakange Anatu karamo dokona namba pulyuo pelyamo lao emba nambana yangonge dupwa lamaiyala puu leya. ¹⁸Maria yuu Makatala range doko pao disaepole dupwa lamaiyuo, Nambame Kamongo doko kandalono, leya. Lapala, Baa pii lamaiyamo dupwa nakama lamaiya.^u

Disaepole Dupwame Yesu Kandeyami
(*Mat 28:16-20; Mak 16:14-18; Lu 24:36-49*)

¹⁹Koro andake alemanji dokopa disaepole dupwa Juu wambu dupwa kando pakapala kambu dowo dolapo pyao gii lapala peteyaminyipa Yesu epapala peteyaminyi raka dokona sukusa karapala nakama lamaiyuo, Mona kyuuo lao singinya renge doko nakama keta palena, leya. ²⁰Dopa lapala baame banya kingi kapepe parali dokopape nakama lasaka piya. Dokopa disaepole dupwame Kamongo doko kandapala raeme kumuyami. ²¹Yesumi nakama dee kamba lamaiyuo, Mona kyuuo lao singinya renge doko nakama keta palena. Rakaneme namba mapanyi peeyamo doko suu pyao nambame nakama pupwa leto leya. ²²Baa dopa lapala nakama kando ñee sepala dopa lamaiya. Imambu Poo Pyasi nyelapape. ²³Nakamame wambu mendena koo dupwa nyuo kame sakamirami ramo doko kame sakamisi sera. Mendena koo dupwa mee range keta palena kae larami ramo doko mee palu palira leya.

Tomasame Yesu Kinyi Lopo Ipyalyamo Lao Soo Kandeya

²⁴Akali akalisa ipisu lama kareyami dokona mende Tomasa lenge kingi mende Reme Paka lenge doko Yesu epeyamo dokopa baa nakama pipya kara naya. ²⁵Kara nayamo dokona disaepole menge dupwame baa lamaiyuo, Kamongo doko kandalamano lyakande, leyami. Lao karalu

^u 20:18 Banya kingi kapepe parali dokopape nakama lasaka piya. (20:20)

kareyaminyipape baa dopa leya. Banya kingi kapena nyili peteyamo mumbwange doko kandapala nambana kingi pambu dokome nyili peteyamo mumbwange dokona suu lao nambana kingi banya parali dokona minyando soo pii naro ramo doko anginde lalyaminyi lao suu pyaa naro, leya.

²⁶Yuu gii yanda ipingi nyero papeyamopa banya disaepole dupwa Tomasamoo pipya anda dokona dee kamba kareyami. Kambu dowa dolapo pyao gii lasi siyamopape Yesu epapala nakama kareyami sukusa dokona karapala, Mona kyuu lao singinya renge doko nakama keta palena leya. ²⁷Lapala Tomasa kando lamaiyuo, Embena kingi pambu doko dakena suu lapala, nambana kingi dolapo kandape. Kandapala embena kingi pyasinju lapala nambana parali doko minyando sepe. Soo neta namba napala kinyi kinyi angiji lao suu pyao karape leya. ²⁸Tomasa baame sepala soo neta namba nao isingi lamaiyuo, Emba nambana Kamongo, nambana Anatuju leya. ²⁹Yesumi baa dopa lamaiya. Embame namba kandapala kinyi angiji lao suu pilisi? Dokoko doŋo wambu namba kanda napala mee angiji lao suu pyao karengge dupwa elyape keta pengge leya.

Buku Dakena Renge Doko

³⁰Yesumi disaepole dupwana lenge kambu dokona yulu andake malu piyami dupwa buku pyasi dakena pali nalyamo. ³¹Pali napyamopape yulu lapona pyasi palamo dupwame nakama Yesu baa Koraisa Anatumya Ikinyingi lao suu pyaraminyipa banya kingi yaki nyii nalyaminyi dokona lao nakama keta kyakana renge palipyali lapala pepa pyao retelyo.

Disaepole Yanda Ipingimi Yesu Kandeyami

21 ¹Enkana ipwa muiyane pete Taipiriasa lenge maronge dokona disaepole dupwa baa kandena lao dee maro leya. Baame dopa pyuo maro leya. ²Saimone Pitamoo Tomasa kingi Reme Paka lenge dokomoo Nataniele yuu Kena yuu Galili silyamo dokona range dokomoo Sepetena ikinyingyi dolapomoo banya disaepole lama mendalapo pipya role pyao kareyami. ³Saimone Pitame nakama lamaiyuo, Namba oma nyela pelyo leya. Leyamo dokopa, Namwa embamoo monale leyami. Potemo papala bote dokona pyakambuyami. Dopa piyamopape kukwa dokopa oma nyii nayami.

⁴Yuu rombalo piyamo dokopa Yesu maronge dokona kareya. Dokopa disaepole dupwa baa Yesu lao soo rola nayami. ⁵Dokopa Yesumi nakama lamaiyuo, Anemasipa, oma lapo nyilyamipi mee? leya. Nakama isingi lamaiyuo, Daa leyami. ⁶Dokopa baame nakama dopa lamaiya. Nakamana oma nyuu doko kingi rolae dorename pyambwapala dokopa kapa nyerami leya. Dopa leyamo dokopa oma nyuu pyambwapala oma ama

malu nyuu dokona kete pyaro kareyasa minyalyuo nyelana saka nayami. 7Disaepole Yesumi mona reteya dokome Pita lamaiyuo, Baa Kamongo doko karalamolamo, leya. Dopa leyamo dokopa Saimone Pita baa Kamongo dokolyamo lao sepala banya komau doko waiya lao pee piya. (Baa yulu pyuo karalana komau kolo reteyamo doko.) Pipala ipwa dokona pyakala peya. 8Dopa piyamo dokopa disaepole lapo dusipa nanesale kara napala bote dokona piso oma nyuu doko oma paleta ipyuo epeyami. v

9Nakama yuunya pyakala epo dokopa dokona isare rao ranga yuu lao siyamo oma rao soo borete opetae soo piyamo kandeyami. 10 Yesumi nakama lamaiya. Oma nyelaminyi dokona lapo minyuo ipupwape, leya. 11 Dokopa Saimone Pita bote dokona pyakalyarapala oma nyuu doko oma andake malumi kete pyao paleyamopa ipyuo epeya. Oma akalisa pao akalisa, dee akalisa kingi paki ipisu rema (153) nyuunya keta pyaro kareya. Nyuu doko rokoyali doko rokwa naya. 12 Yesu baame, Nakama nenge nala ipupwape leya. Baa Kamongo dokolyamo lao sepala apipi lao piso serama ingya nalyamo lao elyapala kaeyami. 13 Dokopa papala Yesumi borete lapo nyepala nakama mokwa soo maiya. Borete maipala dopako pyuo oma maiyako.

14 Yesu kumuo palyuo lopo epapala range disaepole dupwa kandena lao yuu repo maro leya.

Yesumi Pita Kando Pii Lapo Lamaiya

15 Nenge nao otapala Yesumi Saimone Pita lamaiya. Saimone, Jonena ikinyingi doko, akali dusipame namba mona retaminyipa embame namba wakasa mona reto karepe mee? leya. Dopa leyamo dokopa, Kinyi, Kamongo, nambame emba puu minyuo karo doko emba silinyi leya. Yesumi baa lamaiyuo, Nambana sipisipi ikyane dupwa mondo pyuo nenge maiyakao karape leya. 16 Lapala dee lapo pyuo piso siya. Saimone Jonena ikinyingi, emba namba mona reto karepe mee? leya. Leyamo dokopa, Kinyi, Kamongo nambame emba puu minyuo karo doko emba silinyi leya. Yesumi baa lamaiyuo, Nambana sipisipi dupwa rapu pyakao karape leya. 17 Lapala dee kamba repo pyuo piso siya. Saimone, Jonena ikinyingi, embame namba puu minyuo karese? leya. Baame repo pyuo, Embame namba puu minyuo karese? lamaiyamo dokopa Pita mona randaya. Randapala, Kamongo, emba peparae soo gisingi leya. Nambame emba puu minyuo karo doko emba kando silinyi lao kande, leya. Yesumi baa lamaiyuo, Nambana sipisipi nenge pyako karape, leya. 18 Kinyi kinyi langilyu, emba wanyanesa komau range wapuo kata pareli dupwana mee maso pingi. Dopa piinyipape emba emarene dokopa embena kingi pyasinju larenepa mendalimi emba komau wapwakapala paa narō lao

v 21:8 Oma nyuu doko oma paleta ipyuo epeyami. (21:8)

suu pyarene mendasa emba soo parami leya. ¹⁹Dopa leyamo dokopa, Yesumi Pita apa pyuo kumaramo dokopa baa Anatu ketae pyambu para, doko wambo nolakao leyasa piya. Enakana baame baa lamaiyuo, Namba paronuli pyuo ipupi leya.

Yesumi Disaepole Akali Jone Doko Kando Pii Lapo Leya

²⁰Pita kapu kyepala disaepole yango Yesumi mona reto kareya doko kandeya. Akali doko wambu nenge nao peteyami dokopa Yesunya kyangalisa pisipala baa lamaiyuo, Kamongo, emba mata kando lara doko apipi? leya. ²¹Pita baa kandapala Yesu lamaiyuo, Kamongo, akali dake keta apa pira? leya. ²²Yesumi baa isingi lamaiyuo, Namba dee kapu kyo eparono gii dokona lao lete iso karena laro ramo doko embena yulu daa. Embame namba paronuli pyuo epare leya. ²³Yesumi dopa pyuo leyasa wambu dupwame sepala disaepole doko kuma naralyamo lao kopetame suu pyao lapelape lalyalana pyuo lao kareyami. Lao kareyaminyipape Yesumi baa kuma nara leyande daa. Baame, Namba kapu kyo eparono gii dokona lao lete iso karena laro ramo doko embena yulu daa, lao pii dokona lao leyasa piya.

²⁴Yesumi disaepole akali doko kando pii doloma leyamo doko baame pepa dake pyapala pii peparae dupwa mende kyambo leyande daa. Doko baa yulu peparae kandeyamuli pyuo rolae ingyuo pepa piya doko soo gisilyamano.^w

²⁵Yulu dusipa pepana pyao reteyamopape Yesumi yulu malu lapo opetae pyuo kareya dupwa peparaena bukunya piyali doko isa yuu dake bukumi kete pyao aopa lapyali lao suu pilyu.

^w 21:24 Baa yulu peparaekandeyamuli pyuo rolae ingyuo pepa piya. (21:25)